



石詩

正點

上



柳田文庫
 文庫11
 D 181
 1



林
宮

燕
誦

季
鏗

官
會

觀
宸

觀
宸

文庫 11
D / 81
1

010190558032

庚辰仲夏
刊於天南
遜窟

蘅華館詩錄序



聞吳門有天南遜叟博文宏記。洽極群藉。獨
抱忠盡之忱。夙有濟世之志。當粵賊蔓延江
表。自叩轅門。屢進奇策。以事涉嫌疑。不為世
用。浩然歸去。避身山林。華門圭竇之中。壹以
著述為事。然名儒宿德。聞其名者。莫不千里
命駕造廬進謁。由是聲價益廣。人皆尊信焉。
同治己巳。遠遊歐沙。詳察其風土人情政事。

學術及軍法器械諸技百般。欲著一書使談
泰西掌故者為考鑑。於是始有普法戰記之
著。斯書流傳。迄於我邦。余初一讀。竊以為此
書生之譚。雖辭才富贍。譯西史所述。未足以
為奇也。我若相見。應捫蝨而談焉耳。後又讀
遜密譚言。瀛壖雜志。春秋朔日考。甕牖餘談
等諸書。愜然以為此非常之才。所汲涉人之
敵也。區々修邊幅者。非可取當。因遙想望風
采。相慕久矣。己卯夏。雙航遊我邦。東京文士
踊躍相迎。暫寓某氏之邸。一時執贄入門者。
陸續接踵。筆戰墨鬪。殆無虛日。余亦見於城
東一酒樓。同坐者公度黃氏。梅史沈氏。詩五
深氏。皆海外之奇士也。相與分韻賦詩。雙左
聘歌妓。右握花管。孟觴流行。應酬無暇之間。
攤箋立書數首。鈎章棘句。不改一字。詞彙雄
放。如建瓴水。余於是益服雙之英敏。以為不

可與也。於虜斯人而不容於世。天或者嫉其
奇才。不使其肆施耶。抑亦苦其心思。勞其筋
骨。欲使其有為耶。詎橫弃草莽。莫之敢顧也。
叟為人。瓌偉倜儻。不拘禮法。所交不論貴賤。
好為文字。飲當酒。酣耳熱。談諧笑樂。曠然自
放。是以人皆相親。具在寓之。有暇即出遊。或
浮舟于墨水。怡情於花柳。或曳筇于冕山。養
志於丘壑。所至詩之文之。莫不以記其勝概。

十旬之間。得扶桑遊記三卷。韓子訪詔朝為
百賦。暮千詩。頃刻青紅。浮海蜃。惟叟斯足以
當之。叟歸鄉後。未幾。又刻蘭華館詩五卷。附
東行諸友投贈之作。余讀其詩。悲憤激烈。多
憂世嫉俗之言。若只燕遊贈答懷友感舊。皆
雄辯奇恣。往往出新意。雖馳騁繩墨外。而音
節格調。靡不合古。其長篇大作。猶鐵浮圖臨
軍。縱橫衝突。眼空四海。昔人曰。詩膽大如天。

今見斯集。殆信然耶。書肆日泉堂重梓之。乞序於余。因數言以弁其首。

明治十三年冬嘉平月念一日

日本

鴻齋學人石英撰并書



序

詩緣情而作也。夫人必有不能已之情。然後有可以傳之詩。而世乃分唐別宋。尊杜摹韓。斤斤然矜體派標品格。自以為工舛矣。抑亦隘矣。紫詮先生。富於學。卓於識。逸於才。著作等身。不以詩名。而觸事感情。擘箋揮毫。百篇立就。或莊或俳。忽正忽奇。時而陵紙怪發。時而絃外音流。脫盡町畦。自成杼柚。先生之言曰。予不知其為詩也。祇自寫其情之不容已焉耳。嗚呼。此所為不必以詩名。而詩卒不可及。且可歷久彌傳也。去歲遠游東瀛。與其國之文人學士交。酬唱甚多。懼日久稿或散失。遂取生平諸作。彙成一集。付諸手民。凡友人贈和者亦並附焉。蓋以見文字之交。一往情深。而纏綿之致。歎洽之誠。流露於不自知。即千百載後。展卷低徊。昭然若揭也。且夫

惟有餘於情之外者。乃有味乎詩之中。古之人矢口謳歌。豈預計流傳於後世。而以情感情。遂不得不推爲絕調。則知詩無工拙。以有真性靈真情韻爲工拙。或謂先生遭讒晦迹。抑鬱無聊。以詩自遣。方今朝廷求賢若渴。將有人焉。力爲推轂。俾得奮於天衢。施於當世。元微之曰。雕蟲小技。壯夫不爲。此集之成。非先生性所安也。噫。果若所云。則情滯於境。而移於物矣。以是言情。其情必僞。以是爲詩。其詩可知。偉少爲飢所驅。稟承庭訓。不敢耽於韻語。以悞有用之光陰。此中甘苦。旨趣悉屬茫然。顧見世之以門戶判詩。以典籍填詩。甚或以剽竊險隘。敷衍其詩。心竊愧之。光緒紀元之歲。獲交於先生。由是以道義相切劘。數年如一日。故知之獨詳。因泐數言。俾讀先生詩者。知其梗概焉。庚辰端午。愚弟番禺洪士偉拜序。

自序

余不能詩。而詩亦不盡與古今正。惟不與古合。而我之性情。乃足以自見。余足不出里巷。目不觀邱墳。所與交接者。又絕少。當世通人名士。方彘鄙自愧。何敢言詩。不惟不敢更。何足以知詩。然竊見今之所爲詩人矣。擗擗以爲富。刻畫以爲工。宗唐祧宋。以爲高。摹杜範韓。以爲能。而於己之性情。無有也。是則雖多奚爲。慨自雅頌降爲古風。古風淪爲律體。時代既殊。人才亦變。自漢魏六朝。迄乎唐宋元明。以詩名者。殆不下數千家。後之學者。難乎繼矣。詩至今日。殆可不作。然自有所爲。我之詩者。足以寫懷抱。言閱歷。平生鬚眉顯顯。如在。同此風雲月露。草木山川。而有一己之神明。入乎其中。則自異矣。原不必別創一格。號稱初祖。然後翹然殊於衆也。余自少讀

詩自古作者以逮本朝諸大家皆欲討流源窮其旨趣久之益知作詩之難及長雖有所作未敢持以問世惟顧滌盦明經師楊醒甫茂才稍稍見之以爲可存竊嘗謂所貴乎詩者與苟同甯立異必自淺之深由麤而精歷觀古人作亦有不盡佳要其研精殫力積數年十年而後成自有一家面目在夫豈徒以絺章飾句爲事哉性情之用真而學問亦寓乎其中然後始可與言詩矣余今年二十有二歲積詩凡數百首要不盡可存但願質諸天下後世之能詩者以共相印證可也道光二十九年己酉夏四月下旬蘅華館主識於甫里行素園之南窓

張園老民自傳

老民姓王氏素居蘇州城外長洲之甫里村卽唐陸天隨所隱處也老民以道光八年十月四日生初名利賓十八歲以第一入縣學督學使者爲秦中張筱坡侍郎稱老民文有奇氣旋易名瀚字懶今遭難後避粵乃更名韜字仲張一字子潛自號天南遜叟五十後又曰張園老民老民世系本出崑山王氏有明時巨族也族中多有位於朝明末兵事起吾家闔門殉國難始祖必憲甫在垂髫逸出存一線自此至晉侯詒孫載颺居崑凡四世並讀書習儒業有聲庠序間載颺諱鵬翀品端學博尤爲士林所推重以早世子尚幼戚串中有覬覦者乃遷甫里大父諱科進字敬齋習端木術篤厚慎默見義勇赴鄉里稱善人父諱昌桂字肯堂一字雲亭著籍學蘅華館詩錄

張園老民自傳

官邃於經學。九歲盡十三經。背誦如流。有神童之譽。家貧。刻苦自勵。教授生徒。足跡不入城市。老民上有三兄。十日間。俱以痘殤。禱於武林。遂生老民。老民幼時。屢夢浮屠佛像。魂自能從泥丸宮出入。十餘歲後始止。自少性情曠逸。不樂仕進。尤不喜帖括。雖勉爲之。亦豪放不中繩墨。既孤。家益落。以衣食計。不得已。橐筆滬上。時西人久通市。我國文士漸與往還。老民欲窺其象緯輿圖諸學。遂往適館授書焉。顧荏苒至一十有三年。則非其志也。滬上雖爲全吳盡境。而當南北要衝。四方冠蓋往來無虛日。名流碩彥。接踵來遊。老民俱與之修士相見禮。投編贈約。無不以國士目之。中如姚梅伯、張嘯山、周弢甫、龔孝拱。其交尤密。西館中時則有海甯李壬叔、寶山蔣劍人、江甯管小異、華亭郭友松。並負才名。皆與老民爲莫

逆交。惟是時事日艱。寇氛益迫。老民蒿目傷心。無可下手。每酒酣耳熱。抵掌雄談。往往聲震四壁。或慷慨激昂。泣數行下。不知者笑爲狂生。弗顧也。金陵既陷。爲賊窟。而滬上亦以閩粵會匪起。戕官據城。老民思出奇計以復之。卒不能發。憤抑鬱。患咯血。疾幾殆。咸豐八年。徐君青中丞開府吳中。與老民固有文字之契。老民以和戎防海弭盜三大端進言。前後上書十數通。皆蒙優答。十年金陵大營潰。賊竄吾吳。常鎮蘇太。同時俱陷。東南半壁。至此糜爛。四郡村鄉。亦蹂躪無完土。老民於是志愈孤。心彌苦。方捧上官檄。督辦諸鄉團練。老民知其貪詐畏怯。萬不可恃。屢上書。當事代畫方略。言過切直。當事外優異。而內忌嫉之。顧所言頗見施行。多能見効。其最要者。以西人爲領隊官。教授火器。名曰洋鎗隊。後行之益廣。卒

卡從納
切設兵
立塘謂
之守十

以此收復江南。然用其言而仍棄其人。并欲從而中傷之。此老民之所以扼腕太息。痛哭流涕。長往而不顧者也。維時賊於蘇鄉。遍設偽官。立董事。皆土著人。暴斂橫征。偽卡林立。老民固素識諸董事。密相結納。說以反正言。曾帥善用兵。祇以方剿上游未遑。兼顧今安慶已復。援軍且夕必至。不可不自為計。因激以忠義。勉以功名。令諸董事入賊中。說頭目。結內應。皆有成說。其黠者亦從。而徘徊觀望。老民密縱反間。使賊黨互相猜貳。自翦羽翼。諸內應者多急欲見功。勢頗可乘。而當事者遽以通賊疑老民。禍且不測。聞者氣沮。老民急還滬上。猶思面為折辨。顧久之事卒不得已。航海至粵。旅居香海。自此敵門削跡。壹意治經。著有毛詩集釋。專主毛氏。後見陳碩甫毛氏傳胡墨莊毛詩後箋。遂廢不作。同治二三年

間。李宮保方次第克復吳中郡縣。老民代粵人某上書宮保。陳善後事宜。并言諷遠情。師長技。自致富強之術。頗蒙采納。六年冬。西儒理君雅各招往泰西。佐譯經籍。遂得遍遊域外諸國。覽其山川之詭異。察其民俗之醇澗。識其國勢之盛衰。稔其兵力之強弱。道經法都。得瞻其宮室之壯麗。土女之便娟。塵市之駢闐。財物之殷阜。與英之倫敦。並峙稱雄。同為歐洲巨擘焉。既至英土。居蘇格蘭之西境。其地近北極。少燠而多寒。春夏之交。徹夜有光。而山水清淑。巖壑秀美。遊屐所至。殊足娛情適志。九年二月。還粵。此三年中。老民以孤身往還數萬里。嘗登艦樓以眺望。決目極天。蕩胸無際。波濤消其壯志。風雨破其奇懷。未嘗不感愴身世。悲憫天人。擊碎唾壺。淚泫泫墮也。老民既還。自泰西。當事頗有知其冤者。或貽書勸

其出山。或欲託人招致幕下。老民俱謝不往。豐順丁公一代偉人也。尤賞識老民。謂當今通達時務。熟稔外情。莫若老民。爲之揄揚於南北諸大僚。於是諸大僚始稍稍知有老民者。嗚呼此老民。生平第一知己也。老民固極思感激馳驅以報知己。而憂患以來。精氣消亡。才華零腐。既不能上馬殺賊。下馬草檄。又不能雕琢文字。刻畫金石。以稱頌功德。徒爲聖朝之棄物。盛世之廢民而已。辛未秋。普法戰事起。七閱月而後定。老民綜其前後事實。作普法戰紀。是書雖僅載二國之事。而他國之合縱締交。情僞變幻。無不畢具。於是談泰西掌故者。可以此爲鑑。惟倉卒秉筆。或患冗蕪。尙有待於異日之重輯。而老民自知其必傳於後無疑已。癸酉香海諸同人。醵貲設印局。初行日報。延老民總司厥事。老民著述乃得次第。

排印。光緒五年己卯。老民作東瀛之游。藉以養宿疴。滌煩慮。取道滬濱。放櫂金閩。得重見故鄉風景。濶別二十年矣。真覺城郭則是。人民則非。有丁令威化鶴歸來。情況及身而重閱滄桑。生還粉梓。固老民初念所未及料者也。既至日東。遍歷崎陽神戶浪華西京諸名勝。居江戶者十旬。遍交其賢士大夫。一時執贄請受業者。戶外屢滿。壺觴之會。壇坫之開。無日無之。唱和諸作。頗有豪氣。中又爲日光山之游。遍覽諸瀑布。窮其幽邃。老民將歸。日之賢士大夫。餞別於中村酒樓。星使參贊以下。至者百有餘人。日人謂自開國數千年來。所未有也。老民久居粵東。意鬱鬱不歡。恒思歸耕故鄉。卜居於莫釐。鄧尉之間。築三椽之屋。拓五畝之園。藏書數萬卷。買田一二頃。徜徉誦讀其中。優游卒歲。以沒吾齒。願是願卒未能遂。豈

非天耶。嗚呼老民。雖流徙遐裔。僻處菰蘆。而睠懷家國。未嘗一日忘。嘗言此十數年中。時局一變。髮捻回苗。悉數蕩平。左帥用兵。新疆擴地。數萬里。功震寰中。威行徼外。赫然見中興盛烈。然而泰西大小諸邦。叩關互市。輒以兵力佐其商。力所至。各埠設官置戍。艤艦相望。每挾其所長。從而凌侮我。求必應。請必遂。一旦齟齬。環而伺我者數十國。腹心肘腋間。遍布森列。幾於國不可爲國矣。嗟乎。此蓋誤於羈縻之說。而駕馭未得其宜也。近者日併琉球。俄據伊犁。我國家並持節往問。而時虞失和。勢且岌岌。老民外感於時勢之艱難。內憤於措施之顛倒。舊疾陡發。誠使所死得死。亦復何憾。老民有弟。曰利貞。字叔亨。一字諮卿。讀書未成名。而卒年僅二十有七。有姊曰媿。字伯芬。嫁吳村周氏。癸酉六月。先老民而逝。老民妻

楊氏。夢蘅名保艾。字臺芳。娶僅四年。沒於滬。續娶林氏。名琳。字懷蘅。一字泠泠。經歷患難中。與老民同甘苦。老民無子。有女二。長曰婉。字茗仙。歸吳興茂。才錢徵。早殞。次曰嫻。字樞仙。生不能言。嗚呼老民。既無子矣。而復奪其女。不解造物者所以待之。抑何刻酷至斯哉。自始祖必憲。至今二百四十餘年。七葉相承。五代單傳。僅得男子十有五人。老民以下有從姪三人。相繼夭沒。於是自明以來。巍然碩果。僅存老民一人而已。天之所廢。誰能興之。天不獨厄老民。而或將并以毒王氏也。恐王氏一線之延。至老民而斬矣。噫嘻。不大可痛歟。尤可異者。曾王父娶於沙氏。大父娶於李氏。父娶於朱氏。其家並無後。老民弟娶於夏氏。髻鬢俱亡。老民先娶於楊氏。危乎不絕如縷。繼娶於林氏。亦已不祀。祖姑嫁於汪。伯姑嫁於曹。宗

祧址絕。老民族黨無存。密親蓋寡。側身天地。形影相弔。豈天之生是使獨歟。老民每一念及。未嘗不拔劍斫地。呵壁面天也。老民少承庭訓。自九歲。迄成童。畢讀羣經。旁涉諸史雜說。無不該貫。一生學業。悉基於此。自後奔走四方。無暇潛心默識矣。父在未嘗盡一日養。奉母居滬上。扁舟道路。甘旨缺如。而母氏絕無不豫色。但勗以忠義節廉而已。老民母固知書識大體。四五歲時。字義都由母氏口授。夏夜納涼。率爲述古。人節烈事。老民聽至艱苦處。輒哭失聲。因是八九歲。卽通說部。吳門旣亂。母氏憂形夢寐。逮老民遭罹奇禍。母氏竟以憂殞。其生老民。以此積慘終身。痛欲剜心。贖難糜體。雖仍偷息人世。不可復爲人矣。老民於詩文。無所師承。喜卽爲之下筆。輒不能自休。生平未嘗屬藁。恒揮毫對客。滂沛千言。思者或訾其出之太易。至於身遭讒謗。目擊亂離。懷古傷今。憂離用逝。往往歌哭。無端悲愉易狀。天下傷心人。別有懷抱也。老民邇來潦倒頽唐。百事俱廢。去冬咯血。至今未愈。日在藥爐火邊。作生活。深懼一旦溘然。平生著述。必爲人拉雜摧燒。因先將詩錄八卷。檢付手民。其餘藏於行篋者。尙多。不足供餽。覆瓿。因病得閒。聊自料理。所著有春秋左氏傳集釋六十卷。春秋朔閏考三卷。春秋日食辨正一卷。皇清經解札記二十四卷。瀛壖雜志六卷。普法戰紀十四卷。四溟補乘三十六卷。法志八卷。俄志八卷。美志八卷。西事凡十六卷。蕩牖餘談十二卷。火器說略三卷。乘桴漫記一卷。扶桑游記三卷。海陬治遊錄七卷。花國劇談二卷。老嫠贅語十六卷。遜窟譚言十二卷。張園文錄八卷。蘅華館詩錄八卷。張園尺牘十二卷。都

二十有二種。生而作傳非古也。老民蓋懼沒世無聞。特自叙梗概如此。光緒六年夏五月下旬。張園老民識於天南遯窟。

詩評

采采流水。蓬蓬遠春。仙才妙筆。由於天授。七古尤見才氣。豪邁橫掃千人。蓋作者胎息於韓杜。探源於風騷。汎濫於温李。元白融會而貫。通神明而變化之。青邱秋筮之間。何難別樹一幟。壬子夏荷月朔日。華亭弟張鴻卓。讀於滬城客邸。并識清新流宕。雅近靈芬。加以麗藻。可躡温李堂奧。今人不必不知古人。於吾弟益信。天下才一石。吾弟畧盡之。僕亦磊落自負。固不僅於長短句中討生活也。雙鬢星星。一無所就。言之慨然。近於此事。亦不大作矣。弟詩必成名家。僕將來或附吾弟以傳。則幸甚。壬子首夏七日。新陽顧惺滌盒氏識。讀言情諸什。綺麗纏綿。具見錦心繡腸。玉溪生不得專美於前矣。壬子仲夏十一日。海甯李善蘭讀畢謹識。

詞鮮月露。思入風雲。精銳走雷霆。聰明淨冰雪。其才固是不凡。壬子六月朔日。華亭雷棣廉拜讀。一過於海上詩巢燈唇。并識數語以示欽佩。

大著清靈婉約。深得靈芬神髓。惟靈芬於宋人乞靈尊作。於晚唐入手。樹骨實勝。鏗而不已。何難駕靈芬而上之。甲寅孟夏再讀一過。於西人仙樓居。寶山蔣敦復拜讀。

意境超脫。吐屬韶秀。非絕世才華。那能臻此。江甯管嗣復讀。竟謹識。

鉅稿。淡冶秀蒨。大有中唐人意境。七古氣骨雄健。思力沈著。尤不易及。餘姚弟周白山讀後謹識。

古詩俊逸。近體秀麗。其中精練處。直欲頡頏晚唐。所謂筆墨之外。自具性情。吟咏之餘。別深懷抱。吾聞甫里遠山葱蒨。綠水廻環。魯望而後。必有才人。於此益信。時庚申重九。小窓獨坐。風雨淒然。再讀一過。書以志喜。邵陽魏彥拜識。

霍去病。不好陣法。岳鄂王。惟事野戰。仲弢詩境竊謂似之。然有時長槍大戟中。而仍復細鍼密縷。則賢者固示人以不可測也。湘鄉左樞讀過謹志。

仲弢於學無所不通。於詩亦無體不工。五律多深穩。七律多清秀。五古兼參選體。七古縱橫跌宕。是辨香於杜陵老者。每讀一過。輒爲擊節。上元澄之弟孫文川拜讀并識。

集中諸體皆工。清麗芊綿。似温李。排奐奇崛。似杜韓。至於激昂慷慨。悲壯淋漓。則又詩中之豪也。才大如海。固自無所不有。陽湖沐盦弟吳新銘拜讀并識。

少作綺麗纏綿。自是才人本色。至於身經患難。目擊亂離。則

哀思愁音。空溢而出。其黃之也。有素。則發之也。有自。杜陵詩史。夫何間然。讀竟攝具三拜。陽湖弟周弢甫騰虎讀畢謹識。清麗似金荃。豪放似玉局。憂國傷時。悲涼感慨。則似杜陵。仲弢詩境。無所不包。此謂健者。秀水弟次公孫融讀後謹識。詞多偏宕。孔文舉。意主悲涼。庾子山。此郭靈芬句也。請移以評仲弢之詩。秀水弟于辛伯源拜讀并識。

清麗芊綿。渾雄卓犖。兼而有之。一時作者。惟江東老劍。可與抗衡。旅窓夜雨。挑燈讀之。頓忘客居之感。集中少作。已自出人頭地。敢請出示全詩。以豁眼界。庚申三月上旬。陽湖管貽芳讀一過謹識。

飛文揚藻。采緇葩流。自是君身有仙骨。世人那得知其故。光緒元年四月朔日。侯官林昌彝讀一過并識。

統觀全集。以靈慧之思。運邁往之氣。於亂頭麤服中。見天姿國色。始取徑于靈芬。上追坡谷。而秀韻則出唐人。至窮愁亂離。更遭奇禍。境愈苦。筆愈蒼。則杜陵之憂傷。柳州之怨艾。合而爲一。沈鬱頓挫。卓然名家。光緒五年冬十月望日。吳縣楊引傳讀過并識。

越南黎調頓首敬啟。紫詮先生閣下。猥枉文旌。兼頒雅筆。感荷之私。不可言狀。承示滬上感事四詩。迴環雜誦。如挹清芬。諸作詞句雄渾。情志憤激。筆下有若飄風急雨之颯至。而一腔憂時愛國之心。懇款殷拳。溢於言表。益令人嘆息弗置。夫春鳥秋蟲。物候之感。乎詩者也。山風海月。境地之宜。乎詩者也。惟有心人能一一以神明入乎其中。發爲歌章。芬芳悱惻。迥異尋常。嗚呼。人生於世。才與遇乘。則叱咤風雲。刻畫金石。衡華館詩錄 詩評

贊襄郅治。鼓吹休明。以先生當之。夫豈異人任哉。先生器識宏深。才猷遠裕。經濟之學。抗古超今。即使聯翩直上。揚世德而撥巍科。亦意中事耳。何乃鴻冥蟬蛻。物外天全。豐於才。而嗇於遇。蓋未有如先生者也。以先生之才。曾不見用於世。未知造物者是誠何心。豈天以厄之者成之歟。抑蚶隱而豹藏。深潛高蹈。而不爲世網所撓歟。此非鄙人思擬之所能及也。調恭承簡命。有香海之行。自來三年於茲。南闕五雲。鈞韶在夢。簡書是凜。夙夜慙惶。懼職守之難。循歎世途之多巖。逆旅寒燈。蓋有不勝嗚咽者。忽得是詩。不覺胸中根觸。感慨繫之。惟是一行作吏。此事遂廢。案牘倥偬。筆研荒蕪。搔首撚髭。苦不成咏。古人有云。覓句天應悶。狂搜海亦枯。其調之謂乎。不揣庸陋。奉次元韻。以博大方一笑。三春行盡。轉釀輕寒。伏祈

慎護眠餐。爲道自重。

越南潘炳頌首拜手。奉書紫詮廣文先生閣下。炳銜命出使兩臨百粵。今春猶小駐於香海。韶光易邁。芳序扇和。花晨竹候。喟然有浴沂風雪之思。適蒙惠以佳筴。奉揚之下。如挹仁風。對使拜登。感荷無量。使者旣退。臨窻清坐。朗誦所書四詩。初不知爲何如也。三復之餘。風調道逸。意興清微。如錦繡纂組。相絳以爲色。宮商角羽。互合以成聲。不覺令人心脾俱爽。古人有言。曰詩以窮而後工。是作也。歌離弔夢。而憫世思君之心。溢乎言表。以視楚臣出塞。漢妾辭宮。諸作其悲涼激楚。尤爲過之。是豈不窮。不足以見先生之工哉。夫傅巖版築。顏巷簞瓢。聖賢韻事。獨有千古如先生者。可以希之矣。先生博物治聞。富有經濟。當代名公鉅卿。皆稱之爲未易才。洵知人

也。洵知言也。先生勉乎哉。勉而思之。必有所合。行將受知於世。黼黻朝猷。贊襄戎幕。而利澤及於人。聲名垂於後。堯舜君臣事業。胥自此矣。輒不自量。續貂奉正。此外惟萬萬自愛。

贈詩

閱仲弢詩率成五十八字

新陽顧 惺滌盦

不負狂名卽酒名。劉又僻誕似先生。海天涼月愁無際。吳苑秋風客獨行。落魄十年還劍氣。抗歌中夜裂琴聲。賀回李白從來少。敢說吾詩老更成。

贈蘅華館主

崑山孫啟槩笠舫

高才夙慧欲疑年。傾倒明珠錦瑟篇。鄉里無多憐我在。名山有待附君傳。自慙放逐爲遷客。坐對清新想謫仙。珍重今時留息壤。也應早蓄買山錢。

相逢行贈沐盦仲弢

江甯何 詠梅屋

塵海喧闐無可語。斗大城中吾與汝。邇來人事多侘傺。况復十日九風雨。消愁君就杜家康。論戰我思越處女。有時拔劍

蘅華館詩錄

贈詩

茂園叢書

斫地歌。天壤王郎定相許。王郎知名已十年。賣文海上囊無錢。不似張騫心鑿空。但憑騶衍口談天。酒酣狂叫尋吳質。醉倒便藉華陰眠。袖中奇句輒心賞。豈獨神交寶劍篇。人生幾得團沙會。是處相逢可傾蓋。濯纓何必覓滄浪。把袂未妨邀駟僮。行脚無端墮霧中。舉頭徑欲游天外。水仙不奏海山絃。萬竅一聲鳴地籟。

調仲弢

江甯何詠梅屋

王郎三十好青春。家在吳東住滬濱。大隱愛招三島客。小文神似六朝人。崑山片玉休論價。滄海遺珠豈合貧。我亦江湖來泛宅。願傾十萬買比鄰。

謹呈子潛先生四律

嶺南蘭亭舊酒徒

之子清華擅相逢。在海濱。萍隨風所適。葵願日常親。素志稱

奇士。雄心付逸民。論交千里外。遮莫有前因。

忠憤寸衷縈。他鄉念帝京。中原嗟逐鹿。率上孰封鯨。駁業

思憑軾。鴻才欲請纓。據懷篇什富。詩句羨長城。

亂世才多忌。滄江寄此身。龍雖潛勿用。蠖詎屈難伸。詞賦儕

班馬。遭逢異渭莘。玉成天意在。豈遂老風塵。

大造無寒歲。焉知松柏心。風濤堅晚節。身世托知音。著述千

秋重。艱難十載深。道腴堪自樂。安用問升沉。

贈天南遜叟

崧濱老圃楊引傳

鑄成此錯復奚言。聊復潛踪似避喧。大海應成水仙操。夜郎難白李生冤。等身文字工新製。滿目蓬蒿憶故園。未卜一燈重聚首。秋蟲切切語空繁。

長歌五百字。奉贈紫詮妹丈。吳縣楊引傳醒述

少文山水遊。向平婚嫁事。百願具未了。俄已成衰邁。初夏草木榮。欣欣盡生意。古梅丈人行。無復好風致。飄蓬離本根。同岑忽殊地。寄我一封書。相贈多珍異。皎皎明鏡心。惓惓盍簪誼。文采更斑斕。羅巾與香被。其物既瑰奇。其情彌懇摯。女子將有行。云爲添篋笥。張觸舊時懷。言之輒歔歔。我妹昔事君。自慙百不備。我婦出妝奩。一一代籌計。荆布稍光華。坐待香車至。絳帳舊生涯。青箱故門第。與君爲親串。來往無猜忌。維時各少年。議論爭意氣。青雲當致鳥。白命廟廊器。人事竟乖忤。百憂催老大。妹旣早夭折。我婦亦憔悴。世亂起干戈。投淵竟珠碎。罡風一夕來。穠芳怨凋墜。杜鵑枝上紅。滴作眼中淚。彈指二十年。何事不堪喟。君女早長成。已得乘龍婿。我女雖釋弱。送之將結祝。湖其垂髻時。各已失所恃。慘淡白楊風。不驚花姊妹。偷生我與君。已近知非歲。懊惱百無成。盈頭生雪刺。君尤遭奇禍。幾爲虎口餌。脫身東入海。快哉拓眼界。遠窮二萬里。不數張騫使。異域雖云好。豈得久留滯。歸居粵海濱。冠裳雜椎髻。年年有書來。自述不得志。瘴土秋尚炎。頑山春不翠。文士况寥寂。不得佳釀醉。坐此起鄉心。和鴈落天外。故園竹樹蕪。先塚松楸敗。一二舊知交。不死亦已艾。何時得相見。登堂重或拜。惆悵望南雲。何以遙相慰。勸君作達觀。胸中洗滌芥。著作旣可傳。精神亦宜愛。當其鬱結時。長歌聊取快。疎狂獲罪戾。天心終必悔。金雞下夜郎。戚屬重歡會。更製黃絹詞。引取外孫戲。競折忘憂花。獻與老人戴。

感遇言情五言詩四十韻寄呈紫詮外舅先生。

烏程錢徵昕伯

舊夢長洲苑。新居錦石巖。虞翻惟自恨。賈誼只傷讒。燕鶴生
先異。麒麟早不凡。何曾才是累。未免病于喆。器許經盤錯。心
寧畏險暑。雄文拏繡虎。健筆邁驚颿。陸海初傳箭。長星仰見
機。無聲天墮狗。有力地生鷹。大局先甌缺。孤城復鼓儼。開張
元武陣。浩蕩白龍縵。玉帳方論術。金人偶失緘。營蠅俱止棘。
射雉孰爲箴。挺走無殊鹿。狂奔有類鷺。石梁浮遠遠。銅柱矗
嶢嶢。市隱春堪賃。炊虛釜不黠。高歌惟洞蟹。異味得毛蛾。事
竟同張儉。人誰有李嚴。回看曾甌破。不語爲碑銜。海運從魚
徙。天空任鳥鷗。長途七萬里。托命一孤帆。顧影笑如蠋。逢人
態似獬。乾坤容嘯傲。世界更嶄嵌。盡日仍彈鋏。嬉春或舞桴。
思歸魂黯黯。執別手慘慘。下士邛和駟。嘉姻玉比瑛。元珠遭
棄置。散木謝雕剗。漉落雙蓬鬢。粗疎一老饑。翻將鸞翩翩。許

效燕喃喃。雅誼惟當佩。魚書定幾函。論文殊沈渥。味道敢酸
鹹。柳舞須鶯喚。花嬌仗蝶攬。何時承警效。與訪舊松杉。埽徑
延三益。誅茅築一彭。青氈王氏物。白柄杜家鏡。杞菊前身賦。
芙蓉隱士衫。生涯歸筆墨。世網墮杯棬。鉢擊從催句。樽開肯
立監。煩襟千疊幹。往事一叢艾。息壤盟斯在。明神鑒至誠。合
修期共勉。底用問巫咸。

紫詮先生寄示近作卻寄

新甯余堯壽雲眉

新詩讀罷望南州。太息騷人百事憂。烏爲驚弓勞遠翮。魚從
脫網池中流。功名已屬雲隨眼。鬢髮何堪雪滿頭。翹君秦鞭
應早返。繞朝心緒重山邱。時江甯礪局諸君
議招先生回滄
走徧天涯不見人。用陳一山
比郭句交遊到處氣嶙峋。悲君絕域孤
臣淚。愧我頻年獨客身。賈誼有才空抱負。馬周未遇困風塵。

英雄落拓非無賴。肝膽猶將古道親。

讀諸詩後寄呈一律。卽步集中頻年原韻。

番禺李光璇星衡

蠻觸山川事日非。可堪嗷雁半流離。長城信有蒼生託。遯窟宜酬故國知。莫漫酖人猜叔子。端防軼我過西師。瀛壖指顧圖方略。赤手安瀾在轉危。

奉贈仲弢先生

古端州羅兆庚蓉洲

久仰星鳳甚渴饑。龍門今日得瞻依。胸懸金鑑由天授。筆捲銀河作雨飛。入世肝腸成木石。對人談笑盡珠璣。蓮花幕內朋多少。才學如君我見稀。

偶成四律奉贈兼以留別

滿洲延譽桂山

生花一管絕塵埃。海內羣鷺未易才。蓋世經綸偏不遇。憂時懷抱幾曾開。高吟白雪今無曲。浪說黃金舊有臺。遯跡天南緣底事。美人香草鎮堪哀。

斯人未合老巖阿。經濟文章兩不磨。幾見浮雲遮日月。從知平地有風波。性因能定窮愁慣。才到稱奇坎坷多。古道行行誰共語。晝長空唱飯牛歌。

英雄失路復誰憐。絕域西來別有天。遠謫夜郎唐李白。親逢織女漢張騫。九歌鬼向山中泣。一笑人從海外還。贏得雞林聲價重。梯航爭蓄買詩錢。

鍊金端勝買新絲。合鑄揚州杜牧之。顧我獨醒邀我醉。別君太速識君遲。淒清風雨書應達。迢遞關山夢有知。擊碎唾壺涼夜永。碧天如水易相思。

奉贈紫詮廣文二律

萍鄉文星瑞樹臣

蘅華館詩錄

贈詩

五

漫園叢書

去國會輕萬里游。感時翻抱百年憂。苦將清議持危局。暫把空言當運籌。同甫文章傳異域。魯連意氣動諸侯。著答自是千金品。憑仗何人藥籠收。

自信生平第一流。逢君今日合低頭。名山事業爭千古。滄海襟期隘九州。敢屈軍諮王景略。豈徒書記阮陳留。古來材大難爲用。會見明廷側席求。

越南陳希曾望沂

生平少年日。井蛙何太拘。不憚天海隔。一爲長風遊。白雲石嵯峨。珠江水淪流。烟霞合靈鬱。香漢撐羅浮。趙臺與劉闕。千古餘山邱。勝引得王子。雋爽今寡仇。趣跡天南窟。竹素相優游。著書有戰紀。精微獨旁搜。詞鋒撼五嶺。筆力傾全歐。風會如轉丸。列國爲春秋。縱橫數萬言。前著無遺籌。馮煖歎長鋏。

季子傷做衰。君才亦二子。富貴非所求。問君似君志。當爲天下憂。胡乃處林壑。孑然一身謀。君言堯舜世。下亦有巢由。人生各有命。馳逐竊所羞。鯢鵬潛北溟。蘭芷生芳洲。燕雀豈相識。蕭艾非其儔。涵泓學子富。卓犖才子優。坎軻遇子困。落拓境子幽。雖然又何怨。雖然又何尤。不朽有盛事。佳人惟信修。愧我樗櫟材。佐國無鴻猷。中外界天塹。東南風馬牛。荊州此一枹。親見五鳳樓。殷勤接軟語。繡段將何酬。須臾惜分手。臨風懷去留。各勉日新志。聲氣永相投。寒潮湧素月。天路長悠悠。

讀紫詮廣文大著寄呈

汀州賴其勳慧生

君不見海上騎鯨七萬里。蛟宮蜃窟等遊戲。足跡能令遍地球。方稱世間奇男子。又不見少年讀破萬卷書。俯仰流俗留

真吾。古人不作誰知己。任教呼牛呼馬呼。狂奴文章浩蕩驚。
海國壯志顛連困。磨竭此生本爲著書來。底事當年輕投筆。
香海波濤一港幽。片帆無恙且勾留。寄語江東諸父老。耻作
溫嶠第二流。先生醉後歌代哭。飄泊天涯愁畫粥。甕牖猶得
記餘譚。麝煤光瓶三更燭。先生醒來哭當歌。拊撫文字罪東
坡。莊駭胥是謔言耳。畸人寄託訛傳訛。嗚呼有才不遇竟如
此。薦禰難得孔文舉。天之報施非無情。厄君之遇彰君名。君
不見武陽侯程將軍。灌夫視之不值錢一文。

賦呈紫詮先生用感事詩原韻 越南潘炳九霞

關山難越道途脩。海上乘槎暫此留。欲寄隴梅疏驛信。怕聽
窻竹戰宵秋。登樓幾度空懷古。索句何人獨遣愁。莫道乾坤
正多事。四方已慶甲兵休。

越王臺畔暮雲昏。無際波濤湧海門。已見囊錐騰寶氣。誰將
匣劍拭塵痕。江湖不棄謀臣略。君上當事書草莽常懷聖

主恩。憂患須知天意厚。玉成利器辨盤根。

惆悵風流往事空。人生遇合聽蒼穹。定知湖海多雲雁。不遠
關山滯雪鴻。大地環觀馳域外。歐洲變局貯胸中。歸來重補
衡茅集。何日東山起謝公。

閒寫黃庭一二篇。端居多暇意欣然。未應肥遯娛風月。定有
元音寄管絃。賈誼栖遲傷往日。馮唐遇合是何年。草廬未出
紆籌畫。憂樂知爲天下先。

賦呈毀園先生

嶺南王 騫月槎

詞壇樹幟獨超倫。海內羣欽學識真。構思風雲窮變態。揮毫
花草鬥精神。登龍自昔稱佳士。造鳳於今識可人。章句尋常

何足道。知君景畧是前身。

露白葭蒼寄夙思。清輝咫尺隔天涯。葵忱獨抱三秋感。荆範徒嗟半面遲。詩思每隨潮信長。琴心只許夜燈知。近來時事關懷甚。幾度携樽欲問疑。

奉贈紫詮先生七律四首 古猷州吳廣霈瀚濤

十年飄泊遯南翁。跋扈飛揚意態雄。白也世人皆欲殺。鳳兮吾道豈終窮。難消斫地悲歌氣。儘有登樓作賦風。恰恨生才才不用。由來多事是蒼穹。

一卷新詩集衆芬。高樓風雨感君文。名山早擅千秋業。健筆能開萬里雲。本自多情同白傅。那堪蠻語學參軍。飛鴻避彈翔寥廓。不管人間燕雀羣。

碧海茫茫萬古流。興來遙泛日邊舟。閒尋晁蓋風流跡。且結盧敖汗漫遊。姓氏俄驚蓬島徧。鶯花都付錦囊收。少微此夜生芒角。百丈文光犯斗牛。

愧我同爲東海客。卑官抗俗走塵埃。狂奴久已櫻時忌。笑口何期爲子開。白璧青蠅甯足浼。美人醇酒亦堪哀。敬亭山色珠江月。落落寰中兩霸才。

七古一篇奉贈天南遯叟 嘉應廖錫恩樞仙

神山雲氣滃而深。神山芳樹鬱森森。雲欲暮兮春在樹。倍思空谷之足音。我住神山已三月。舊雨不來今雨歇。俄傳門外客星臨。天南遯叟前通謁。遯叟舊是吳中豪。樹幟騷壇意氣高。一朝被謗遯南服。看花飲酒快遊遨。遊遨到處人爭識。七萬餘里經西極。蓬萊神仙把手招。挂帆又指扶桑國。船至神山十日留。西都名勝甲蜻洲。真山真水真圖畫。付與才人筆

底收。昔讀君詩感君遇。今日逢君爲君訴。立身須自定千秋。那管旁人來毀譽。志存忠孝報君親。不在爲官在爲人。德行本根文藝末。高曾矩矱師先民。刻楮雕蟲徒小技。風雲月露詞何靡。君才實大出緒餘。愛國憂時是詩史。杜老浣花陸劍南。天南遯叟鼎而三。他時刻就東游集。寄與神山俗吏探。

賦呈紫詮先生

日本龜谷行省軒

雄心欲著祖生鞭。遊徧歐洲路八千。慷慨談兵辛棄疾。風流耽酒杜樊川。世無知己堪惆悵。天付斯才豈偶然。新史好藏東海外。芙蓉峰聳鬱雲烟。

卽席贈弢園先生

日本川田剛甕江

漫遊乘興上輪船。來泊扶桑日出邊。著述等身人未老。風塵遯跡骨將仙。豈求靈藥入三島。欲訪逸書存百篇。莫怪相逢傾蓋久。令譽夙自藝林傳。

奉贈弢園先生卽和甕江韻

嘉應黃遵憲公度

神山風不引迴船。且喜浮槎到日邊。如此文章宜過海。其中綽約信多仙。司勳最健言兵事。宗憲先聞籌海篇。團扇家家詩萬首。風流多被畫圖傳。

奉贈仲弢廣文步甕江原韻

餘姚沈文煢梅史

東泛滄波太乙船。直追槎木斗牛邊。誰知勾漏山中叟。來訪盧敖海上仙。蠻觸新書成戰紀。源平遺事入詩篇。雞林賈客爭相問。不讓香山萬古傳。

賦贈弢園老民

日本增田貢岳陽

叩轅獻策靖邊氛。未見酬庸報夙勳。組練三千吳市甲。背嵬五百岳家軍。避人常下南荒淚。遯跡空瞻北闕雲。自古奇材

終有用。偉人江表定推君。

讀紫詮先生詩文集賦呈

日本吉田次郎

觀遍歐西興未休。飄然又作海東遊。諷時詩句擬諸將。

大集中有

擬杜詩將五首論勢文章洞五洲。故國鶯花應入夢。殊鄉風雨豈無

愁。獻酬倡和新知足。好醉江頭小酒樓。

讀紫詮先生詩文遙寄一律

日本山本居敬

逸氣飄然事遠游。滿腔才思湧江流。詩過穠縟歸於淡。文極艱辛得自由。渡海客來傳著述。趨風人競覓賡酬。操觚嘆老世皆是。惟有先生未白頭。

寄贈紫詮先生次吉田次郎韻

日本牧田彥作

先生豪氣死難休。幾度東西異境遊。明月秋高懷遠浦。薰風夏半夢香洲。詩人湖山以賦詩橫渠何多感。把酒看天特破

愁。笑我平居作牛後。呼盃獨上庾家樓。

聞紫詮先生西來賦此寄呈

日本秋永照隣

不擬蓬萊採藥船。東航探勝賦詩篇。山浮富士千年雪。日湧扶桑萬點烟。詩境悲涼同島佛。文才跌宕比坡仙。元亭如許停車訪。欲結將來間字緣。

卽席賦呈紫詮先生

日本石川鴻齋

驚見文星照海東。才人遠近盡趨風。公超到處門為市。孫綽從來賦最工。步詠花陰傾玉盃。坐吟月下撫焦桐。只看鳳鳥翔千仞。難縛中原結網中。

宏名轟耳恰如雷。何幸今朝共舉杯。台獄雲深仙客去。江城日麗碧桃開。衣冠夙謝三公貴。草莽還占八斗才。更羨胸中富文史。飄然駕鶴下蓬萊。

席上呈張園先生

日本狩野良知

逍遙海外作鵬遊。足徧東西歷數洲。意氣乘風濤萬里。文章經國業千秋。功名不願記雲閣。轍跡且期周地球。猶有謫仙緣未了。何妨詩酒託風流。

賦呈張園先生即以志別

日本中洲三島毅

孤帆千里抵雲天。采藥來留蓬島邊。江左賊由奇策定。泰西戰待鉅文傳。交情不隔道猶古。吟骨惟疑人是仙。何事秋風促歸去。陽關一曲入離絃。

聞紫詮先生將歸賦此寄呈

日本中村正直

飄然乘興日東遊。才學如君乏匹儔。筆役風雷多逸氣。胸羅星斗足奇謀。久思對榻縱談未。能肯命車來訪不。那忍匆匆分手去。天涯好會再難求。

卽席賦呈并送南歸

日本湖山長愿小野

幾度飛臺賦遠征。大西洋又大東瀛。却嗤霞客游踪窄。最愛雲臺學術精。芳草綠波他日夢。紅絃珠唱此時情。也知新著刻成近。署否老夫賤姓名。

席上呈紫詮先生兼送南行

日本巖谷修誠卿

光怪驚看大陸離。泉源萬斛湧文思。杯槃對酌猶新識。肝膽相投卽舊知。品紫評紅温尉什。傷春惜別杜陵詩。賤名喜入柳州筆。探勝晃山攜手時。

聞紫詮先生將行寄呈

日本本多正訥

夙聞吳地有詞仙。萬里遙浮徐福船。早識文章關至性。獨從忠孝得真詮。問奇誰識揚雄字。獻策長留賈誼篇。莫厭天涯淹滯久。相邀爭設主賓筵。

舊唐書金剛經

奉贈天南遯叟

日本朗廬阪谷素

乘槎破浪走龍鼉。想是東游逸興多。自古奇才遭貝錦。平生至性託黎渦。欽名欲下涪翁拜。憂國時聞杜老歌。丹酒如泉澆塊壘。伊丹產美酒淹留且養碩人藎。

席上賦呈紫詮先生

日本丸山鑽子堅

扇影衣香畫樓。酒邊涼意暑初收。縱橫詞筆貫天地。磊落胸襟凌斗牛。羈客情懷逾杜牧。新橋風物勝揚州。流連只合長今夕。楊柳如春月似秋。

翌日再呈重用前韻

日本丸山鑽龍川

高蹈常輕萬戶侯。乘槎文作海東游。媚山明水入吟眼。闌雨長風牽客愁。夙讀著書神既往。相逢傾蓋意先投。他年我亦西行客。詩酒追隨君許不。

席間賦呈紫詮先生

日本關根癡堂

天子呼來不上船。句用乘槎萬里忽飄然。囊中詩刻三千首。海外名傳二十年。餘事觀風仍紀俗。高情攜妓又參禪。揚州花月寥寥甚。久待豪遊騎鶴仙。

奉贈張園先生即送其歸粵

日本龜谷行省軒

人中之龍文中虎。張園先生即同甫。張瞻明目論時機。赤日皦皦披雲靄。粵賊凶縱滿乾坤。激昂獻策叩轅門。雄志未伸賊未滅。橫罹奇禍銜深冤。一朝決策遊西歐。長風萬里逐鵬搏。英雄割據尚未已。虎視龍驤互相吞。與亡古今幾感慨。抽筆窗前鬼哭喧。歸來頭白不稱意。飄然又到扶桑地。聞說扶桑有逸書。欲搜小酉識奇字。余亦東海一狂夫。氣凌虹霓才本迂。讀書萬卷歸畫餅。空餘傲骨老窮途。相遇論交江樓夕。

蘅華館詩錄 增詩

張園叢書

綠酒淋漓披肝鬲。興來起舞蛟龍驚。詩成金箋紅袖擘。潑墨直傾長江水。揮劍擬鏟遙山碧。忽聞驪調激秋風。白雲慘澹雁橫空。一別萬里恨參商。幾時追逐學雲龍。君言丈夫一世歎髀肉。精神應注著述中。嗚呼青紫紛紛不足論。何如開拓萬古之心胸。

從神戶寄和弢園老民

古猷州吳廣霈瀚濤

仙雲冉冉集蓬山。且向林花一解顏。我愧東遊櫻世網。君應南去閉柴關。高談落帽驚飛鳥。急電穿櫺恸小鬟。煮酒英雄今在否。幾回懷古看刀環。
天生名士紹風流。世事無勞借箸籌。避禍田橫猶島國。談兵杜牧自揚州。驚心作客徂三載。稽首求仙向十洲。閑立高風同拍手。謝他肉食運奇謀。

海頭遙指白虹生。灑酒勞君進一觥。學劍漫愁無利器。攻詩直欲比長城。王孫乞食渾無賴。阮籍狂歌太不平。舉世滔滔誰與易。天教沮溺好同耕。

湖海元龍氣自豪。眼中今日見王韜。論心不覺傾三雅。養勇何妨挫一毫。醉臥有時懷管樂。笑談無語及蕭曹。東方桃李君栽徧。贏得浮名北斗高。

番禺梁肇晉少亭

贈紫詮先生

西遊已倦倏東遊。遊遍瀛環大九州。海上三山歸巨眼。天涯萬國數從頭。不聞杜甫依嚴武。應有常何薦馬周。無奈小儒多昨舌。五都羣詫夜光投。

寄呈紫詮先生以志景仰

嶺南王 騫月槎

鴻才自古出鴻儒。經濟文章曠世無。雄辯天生王景略。妙詞

人羨阮元瑜。平生意氣空千載。遠道烟波夢五湖。羞向終南
趨捷徑。誰知抱負有驪珠。

花落閒庭草滿除。問奇有客此停車。匡時愧我空談策。垂世
憑君獨著書。望氣竟從三島外。知音還在七絃餘。東山不奪
蒼生願。終見商霖展夙儲。

余將北游津門。席間賦呈弢園先生。并以言別。

日本曾根俊虎嘯雲

去年聞君靖洲京。詞壇遠近傳君名。今年見君海國城。綺筵
跌宕懷君情。目光如電氣蓋世。議論叱咤風雲生。君言讀書
不得意。頭顱如許無所成。君昔壯遊萬里外。西鄰冰海東蓬
瀛。阿蘭觀日叩真宰。扶桑濯足恢前程。牘背三千秘文字。胸
中十萬藏甲兵。惟君襟懷多磊落。攬轡壹志圖澄清。方今歐

亞相並峙。厥勢強弱難抗衡。藩籬盡撤屏障失。譬如大厦將
頽傾。我思古昔益慷慨。時欲呼天鳴不平。中朝與我唇齒國。
結好况是稱同盟。一心併力足禦侮。鬪牆何暇爲鬥爭。君之
所見與我合。有如鸞鳳鳴同聲。東來倉卒不久住。高樓置酒
送我行。檀槽急向當筵奏。異方聞樂心怦怦。我今別君請自
愛。慎毋痛飲如長鯨。北游燕趙多奇士。屠沽意氣輕公卿。彼
自悲歌我擊筑。酒酣各自抒愚誠。明年春風二三月。萬楊柳
絲千花明。我將與君再相會。當須一飲三百觥。更爲喚取雙
明娥。親煩玉手彈瑤箏。一曲既終意未盡。掛帆自此賦長征。
君雖不遇慎勿疎。隱居坐待天衢亨。

小住香海感成四律奉贈 漢軍玉仲蘊 璘

山陬海澨記游蹤。選勝搜奇見此翁。拔劍一時同斫地。高談

四座可生風。倘論豪氣應千古。誰回詞壇角兩雄。笑我悲歌同阮籍。猖狂端不爲途窮。

天涯執手一長吁。時局翻新異古初。仗節未能降冒頓。快心幾見襲扶餘。虛言桑景橫磨劍。實事南狐直筆書。君所著書所載近事

大都實錄話到百端交集處。酒酣抵掌意躊躇。紛紛海若忽揚塵。漆室燈昏太息頻。議論難爭秦典客。縱橫

惟見魯行人。誦詩三百談何易。下筆千言倘有神。材不材間無位置。敢將蹤蹟感沉淪。

早知文字誤平生。楊意難逢眼未青。狂論敢緣知己發。罪言休使外人聽。沈酣典籍歸無用。舖啜糟醜悔獨醒。胡蝶夢周原爾爾。且隨海運徙南溟。余時將之海南

蘅華館詩錄總目

卷一

古今體詩一百四十八首

卷二

古今體詩一百三十一首

卷三

古今體詩八十一首

卷四

古今體詩七十九首

卷五

古今詩體一百三首

卷六

卷七 卷八 續出

蘅華館詩錄總目

右詩五卷。都五百四十二首。光緒庚辰五月下旬。遜叟編次。既竟付之手民。嗚呼。余敢以此自信。爲詩而竟欲問世哉。惟是三十餘年來。境遇閱歷。悉在於是。展卷披吟。髣髴可憶。存之聊足以見我性情。云爾。余行年五十有三矣。日月逝於上。體貌衰於下。文章未就。事業無成。遙望故鄉。相隔萬里。頭白齒危。未有歸期。局促一隅。疇與倡和。親朋既絕。嗣續永無。魂魄一去。同歸秋草。以此思哀。哀可知已。是則因編此詩而淚。又不禁涔涔下也。

蘅華館詩錄卷一

長洲 王 韜 仲 弢

不忘

欲從太上證靈修。不忘鴻泥此小留。轉眼鶯花人似夢。當頭樓閣月如秋。青山有約空埋骨。紅豆前生早種愁。填海補天應亦易。相逢今世合休休。

無端風雨困黃昏。獨替花愁早閉門。篋裏尚存新韻本。壺中已凝舊啼痕。生無可樂何辭死。情尙難忘况受恩。灑盡悲秋叢菊淚。荒江寂寞臥楓根。

玉色瑤情一瞬空。幾回呵壁叩幽穹。簾前語不聞雙燕。地下書難寄隻鴻。但有離魂來夢裏。徒懷同命各心中。燈昏酒冷誰消遣。強起盪豪賦惱公。

蘅華館詩錄卷一

叢園叢書



惆悵詞成錦瑟篇。歌離弔夢總淒然。一生恨事空花月。半夜
哀音迸管絃。莽莽寒煙埋宿草。茫茫逝水送華年。藥爐茗碗
無聊日。合寫楞嚴懺悔先。

吳江徐仲寶至

去年人日君始來。草堂喜報梅花開。今年君至已晚矣。梅花
如雪落江水。一度花開一度思。今年人非去年時。名場微逐
不得意。出口都成危苦辭。方今俗學工相皮。文字高寒識者
稀。讀書豈徒弋科第。力古乃不救寒飢。吾黨徐生異庸衆。能
出清聲懼羣鬪。祖孫父子皆妙才。詩名詎以隨園重。謂君祖山民先
生飢驅飢驅且出行。書生意氣輕公卿。朱門三重未敢通。甯
質臯廡依吳中。吳中至此路尤近。片帆落手天風引。杞菊誰
堪作比鄰。昔日名流今已盡。王微本不好詣人。里居寡懽跬

步窘。我欲乘風作遠遊。與君嘯傲凌滄洲。

小飲青蘿山館呈顧滌盦師

欲雪不雪天釀寒。啾啾凍雀愁簷端。地爐活火聊取煖。一尊
入口僵顏歡。新坵甕泥出餉客。香浮色淡味獨完。吾師不飲
好人飲。尤喜脫畧禮數寬。王郎本耻作小戶。深盃不厭一吸
乾。酒闌每易生感慨。敢抒愚論披心肝。伊昔操筆纔舞勺。其
時我猶未識韓。文章麗解蒙公許。豈有羣書卓犖觀。今日幸
備弟子列。步趨敢曰升堂難。中吳詩學久不振。誰執牛耳雄
高壇。金陵流派工簸蕩。公其挽之排狂瀾。佻淫積習冀一變。
目笑羣兒肆擊彈。靈芬秋水雖後起。清新漸趨爲雕刊。怪公
閉戶坐寂寞。却來賣藥供朝餐。再拜陳詞敬請益。空仰叩坂
心愁歎。

送徐仲寶之吳門時亦有錦溪之行
空堂相對雜離思。秉燭宵分聽漏遲。今夜月光同領畧。明朝
帆影各參差。功名大有衰門感。文字難期末俗知。澗曲孤雲
吳苑樹。憶君最是落花時。

渡范遷湖

朝暎射窗喧雀聲。久苦寒雨喜新晴。舟子曉發叩門至。持書
促我錦溪行。錦溪此去只廿里。風便掛帆頃刻耳。春水漣漪
溪漲平。蕩漾荇藻生空明。小艇搖搖日未午。大河前橫路若
阻。煙深岸潤不見人。獨聽空江響柔櫓。此湖舊以鑿清名。水
色澈底玻璃清。或云范蠡遷家至此間。湖濱卜築名遂傳。當
年功就知機早。一舸載得西施好。屢散千金溷俗賈。上士大
笑未聞道。晚年想已厭網羅。乃來此地娛烟波。嗟予亦爲名
利縛。何時歸釣隱邱壑。

飲錦溪書舍示主人

吳淞廿里錦溪頭。天風送我扁舟遊。主人築室邨之麓。門前
新漲一江綠。短草緣階青滿庭。雜花映戶紅入櫺。此齋地位
雖偏促。安頓書倉亦已足。仲宣乞食來此邦。忝與主人羣紀
行。主人爲具酒一石。呼與鄰翁相對酌。嗟我結廬淞水東。年
來飄轉如飛蓬。人生苦爲微名累。不然種秫謀日醉。但力耕
田閒讀書安辭長。作農家居未知此樂何時有。吾言不食如
此酒。

遊里東僧寺

遙指寺門處。蒼然夕照沈。石堤故盤曲。鐘閣極蕭森。環水長
春草。推窓驚暮禽。地需幽僻好。何必美山深。

蘅華館詩錄

卷一

三

澁園叢書

小樹花初著。殘僧茗自煎。林煙團處暝。檐月墮來圓。卽此幽
棲地。居然八九椽。結廬何日遂。石瀨溜涓涓。

錦溪僧寺讀墓碑偶作。

錦溪本名陳墓。俗傳宋南渡時。陳妃瘞此。故名。今墓
在僧寺左旁。斷碑嵌置。壁間字跡漫漶。幾不可讀。然
大要一達官塚耳。拾遺之廟。小孤之山。沿訛久矣。不
足辨也。

吾來錦溪柳已絲。偶閒步履游叢祠。高隄曲折石犖确。其中
四面皆成池。爲搜陳跡來相訪。參差樹影江流漾。簷前微雨
朝初晴。湖中新水春來漲。一角低迷林外煙。歸然有冢峙其
間。殘葉隔年猶未掃。誰於此下酣長眠。云是高宗昔避敵。後
官佳麗隨君側。風塵憔悴陳妃子。惺松曩髻髻病難起。可憐不

得同輩行。一朝簫管葬傾城。我聞此語心未決。五百年來驚
倏忽。上天空見玉棺臨。下世徒傳金盃出。宿草紅心帶弱魂。
半鈎冷月照黃昏。明眸皓齒千秋劫。寶鬢羅裙雙淚痕。風飄
衣上桐絲落。野棠自紅水自綠。牆脚摩挲徑丈碑。則苔剝蘚
文堪讀。字跡依稀辨未明。約畧勳業言平生。鬚眉致屈爲巾
幘。向來顛倒從人情。今人好色盡如此。相沿紕繆何足耻。回
首笑問南能僧。始知耆老言無徵。真娘墓上題詩慣。蘇小墳
識西陵幻。後賢憑弔徒紛紛。明妃青冢何人見。嗚呼帝王陵
寢且飄零。惟此坏土獨得長。共溪流清寺僧聆。我論不辨微
爲鷹。鵲噪屋角三兩聲。但見落日山頭橫。

坐愁不寐。池月上窗。靜中有覺。紀之以詩。

蘿壁上新月。竹徑團晚煙。茶鎗水自沸。藥鼎火宿然。散髮坐

成夕涼風來衣邊。燭滅生虛白。幽人應未眠。蟲聲窻隙透。花影牆凹穿。空庭寂無語。此意誰爲傳。

接家書後卻寄

一紙書來仔細看。先看紙尾署平安。春深猶有餘寒在。路近何愁欲寄難。小病無因偏止酒。十行相訊勸加餐。蠻箋燈下匆匆寫。便數歸期半月寬。

○夜坐

安置詩筒併酒尊。孰憐丐食滯江村。瓦鉞沸聽茶聲急。蘿壁搖看燈焰昏。花補籬凹疎有影。月斜屋角淡無痕。故鄉舊侶應相憶。重聚西窗與細論。

偕同人泛舟吳門夜泊滄浪亭

放櫂吳淞口。扁舟過野塘。三人情自永。卅里路偏長。溪草隨

波綠。籬花隔岸香。倚檣無限意。不覺暮雲蒼。約略水程盡。猶從郭外盤。山銜斜日下。風急客衣寒。學業慙書劍。音塵困鳳鸞。所思不可見。懷抱幾時寬。小泊滄浪側。鄰船笑語聞。聯詩多未竟。中酒已微醺。思爲離鄉雜。情偏與友殷。昔賢曾此隱。想像感遺文。燈施更闌後。紛然酒欲醒。去家原未久。此路亦頻經。鄉夢如雲住。人聲隔水聽。歲華空復逝。慙愧鬢絲青。

書所見

桃花門巷鎖葳蕤。解識春風見一枝。隔岸好山先露面。照人新可宛成眉。驚鴻影斷迷來路。覆鹿疑深繫去思。不待重尋已惆悵。等閒吹白鬢邊絲。

縱不相思亦可憐。每羞憔悴在花前。淡雲有影流如水。殘夢

無痕化作煙。明日天涯從此遠。今宵燈畔未成眠。姑蘇臺下紅心草。多恨多愁總夙緣。

題畫蝶

夢魂栩栩繞階前。苦戀春光祇自憐。芳草王孫今已老。落花如雨雨如煙。

初夏

柳絲疏地柳絲颺。簾外桐花風送香。春去亦如人易老。事忙偏覺日非長。鷓鴣隔夜猶啼雨。蛺蝶鄰家時過牆。清簟生紋涼似水。且從晞髮一徜徉。

錦溪寄懷詩四首

顧滌蠡明經師

青蘿館裏碧琅玕。一片陰森六月寒。曾否新詩鈔十手。定知好竹長三竿。文章小技慙翻籍。衣鉢名山託柳韓。大藥駐顏容市隱。廿年高臥此衰安。

楊醒蓮茂才

身世悲涼感不禁。哀音淒戾失巢禽。蜀都風月愁無際。故國冰霜歷已深。更少衣從沽酒典。祇餘詩爲送窮吟。東歸常下依人淚。一臥江鄉百慮侵。

徐仲寶秀才

繞里梨花三百樹。閉門中有草堂幽。業承名父終傳世。詩到才人例感秋。八月波濤飛白下。一簾煙雨夢蘇州。鱸香領畧功名小。搖落江鄉爾許愁。

懷蘅閣內史

不是愁中便客中。生憎勞燕各西東。才人例不登金榜。仙子

蘅華館詩錄卷一

應還住玉宮。曲桁簾波看瑟瑟。迴廊屐點聽弓弓。銀河咫尺
如天樣。只有宵來綺夢通。

夏日讀書迦陵精舍

復作歸歟想。扁舟至里門。蹉跎慙未補。文字向誰論。岸遠疑
無樹。雲深若有村。暮鴉斜照外。帆影總昏昏。
小築通幽處。禪寮靜不嫌。蒼香風入牖。蕉綠雨侵簾。爲拓三
弓地。能消九夏炎。短椽容我借。檢點置書籤。
竹影碧團欒。蕭然六月寒。涼颼來戶牖。落葉上闌干。有約應
相踐。無花可共看。西風吹不歇。窗外咽聲乾。
伴石花偏好。窺簷月又圓。若能占五畝。亦欲構三椽。築室當
松下。開門臨水邊。圖書叢裏坐。把酒意陶然。
咫尺隣蕭寺。高僧亦偶逢。晝閒時隱几。日暮又聞鐘。窓竹鳴

秋急。牆花弄影重。簾紋如滑笏。高臥正從容。
煮茗初聽沸。看棋偶遣忙。桐陰當晝靜。薤葉過風涼。清坐情
偏適。深宵話更長。懽然團聚久。此樂莫相忘。

夜起

蘿月淡掛壁。夜深萬籟寂。星稀看或無。露重聽欲滴。寒蟬啼
近人。燈裏語唧唧。秋士聞秋聲。使我心中惻。况復送遠風。高
樓正吹笛。

偕朱癩卿夜集青蘿山館。明日將同發白下。

屋山晨聽乾鵲啼。故人有約來錦溪。布帆無恙秋風快。停舟
繫纜聞午雞。忽地吾師折柬招。相期剪燭娛深宵。隔竹茶煙
清若水。夾松月影冷於潮。觸熱披襟當牖北。牖邊樹影濃遮
屋。疎疎小雨晚初晴。娟娟淨綠涼微生。迴憶疇踪亦已久。可

知今會原非偶。半載常深似海情。一口欲吸如准酒。酒盞更
闌話漸稀。更添涼意上生衣。黯陰欲歇寒蟲語。簾裏忽見流
螢飛。此時相對情獨絕。天上星稀乍明滅。簟角紋生衆籟寂。
竹梢露重數聲滴。今夕何夕共此堂。明日之日官道旁。白門
一片秦淮月。又爲他鄉念故鄉。

自許關至丹徒舟中所得絕句

曉關十里散涼煙。尚見星光照水邊。岸上露蛩啼不歇。樹痕
濃護佛祠前。
行經南望亭邊路。高岸迴潮曉夜渾。却羨數家茅屋好。隔籬
竹裏自開門。
獵獵船旗颭遠風。黃茅蓋屋土成墉。一堤烟柳橫林近。正好
泊舟聞暮鐘。

丹陽城外暫停棹。雨過山痕淡欲消。苦憶新豐佳釀熟。隔溪
村店一帘飄。

雲氣半江涼欲雨。水痕兩岸暝成烟。舟行要識秋來處。盡在
蘆花楓葉邊。
板牀竹簟夢難成。底事秋天未肯明。愁思連朝偏爲酒。聊拈
詩景破鄉情。

夜行

夜來微雨斷。燈影出孤籬。歷亂墮流螢。扁舟過兩岸。

小泊七里江

繫纜平橋晚。楓林正落暉。榜人閒倚櫂。水氣暗侵衣。圓月翻
波碎。孤雲待族飛。遙看煙樹外。漸覺過帆稀。

舟膠新河中乞潮伍相國

繫舟樹下等潮開。再拜靈胥奠酒杯。江岸濤聲成險壑。吳宮
草色上荒臺。千帆迎水鳥檣集。一線衝波白馬來。淹滯征途
向誰告。急投詩句敢相催。

黎明渡江卽事

一片喧呶客夢驚。篙師解纜促舟行。依微岸遠秋無際。浩蕩
潮來夜有聲。殘月不明猶掛樹。布帆無恙更催程。曉烟欲散
啼鴉起。好景濛濛畫未成。
風雨聲如萬騎連。奔龍澎湃挾危舷。河山自古分南北。波浪
無邊接地天。出沒江豚夜吹霧。翻騰水怪曉飛涎。好將枚叔
吟秋筆。寫出觀濤賦一篇。

夜泊白下水西門

帆檣羣赴水西門。遠寺鳴鐘晝已昏。六代江山餘霸業。千年
草木入燒痕。遙憐北固分秋色。莫話南朝愴客魂。兩岸歸鴉
寒意重。篷窗風雨與誰論。

剪燈相對雨茫然。約畧行程問長年。三日渡江風絕險。終宵
傍岸雨如懸。隔船人語聽偏寂。到枕潮聲攪不眠。準備輕舸
湖上去。莫愁渡口問前緣。

至寓齋作

事業前朝付劫灰。秣陵王氣亦堪哀。過江詩爲悲秋作。捫石
人誰訪古來。室借三弓閒憩足。酒須一石客懷開。釣魚巷側
秦淮畔。應有簫聲到鳳臺。
秋來芳草遍閒庭。一桁疎簾六扇屏。牆缺正當殘樹碧。屋低
不礙遠山青。疎花入夜窓無影。涼月著人醒未醒。剪燭更闌
渾欲寐。那堪舊事話零星。

欲寄

尙憶前番握手時。未行先欲問歸期。最憐離別牽紅袖。反怨功名鎖翠眉。乘月輕帆偏獵獵。和烟衰柳尙絲絲。金錢長夜休頻卜。爲有檀郎絕妙辭。

新寒幾日襲簾幃。旅思紛然願總違。劣有心情連日醉。祇餘魂夢昨宵歸。夜深愁聽百蟲語。月落驚聞獨鴈飛。只恐夜涼花下坐。露香風警透羅衣。

疏簾隔斷一溪煙。叢鬢長眉絕可憐。碧玉工愁偏此日。泥金寫帖是何年。詩題桐葉人雙笑。被冷蘆花客獨眠。細雨黃昏無奈甚。殘燈明滅短窓邊。

過伍相國祠

伏劍竟身死。夫差豈霸才。恩仇何所見。忠孝半成灰。秋至潮

聲壯。春深鳥語哀。胥江祇尺土。荒草上蘇臺。

過古廟

金粉荒涼舊事非。深林不見鷓鴣飛。尙留斷碣苔侵石。惟有長松葉墮衣。隔岸寒雲殘照暝。閉門疏雨過人稀。前朝興廢從何問。遙見牧童烟裏歸。

白下雜詩

皆寓齋紀遊之作。策蹇之辰。拏舟之日。偶有所歷。輒

錄於篇。

年年蕭管泣秋風。丁字簾前燕影空。偶見隔湖小兒女。髻花簪得可憐紅。

秦淮韻事半成煙。人影衣香爲惘然。我是年來銷綺夢。忍彈舊曲聽公絃。

蘅華館詩錄

卷一

十

投園叢書

蘅華館詩錄

卷一

十

投園叢書

薄陰遊女晚來稀。妙相菴邊樹四圍。隔著垂楊剛見得。不知
微雨濕秋衣。

莫愁湖畔豈無愁。水閣珠櫺盡下鉤。郎自乘船妾鼓櫂。綠何
此水慣分流。

我到隨園日已昏。從前壇坫渺無存。風流雲散難追憶。月掛
烟蘿微有痕。

裙屐清游久寂寥。秋墳詩鬼暗魂銷。絲絲弱柳疏疏月。盡把
興亡付去潮。

景陽宮殿久成空。豐草蒙茸臥巨鐘。井底寒泉流不歇。但聽
四野亂啼蛩。

秋水文波碧似羅。吳儂船上聽吳歌。誰家燈火簾櫳遠。纔到
鐘鳴月滿河。

遇雨將飲巾一角。衝泥幾誤路三叉。清涼山下四圍碧。盡日
騎驢自看花。

鴉帶寒雲入遠村。荒祠斜日淡秋痕。滿山黃葉落如雨。愁聽
疏鐘白下門。

秦淮卽事

來遊最好晚晴天。約上秦淮泛畫船。十里鶯花供跌宕。兩河
簫管艷神仙。消除豪氣惟詩裏。耽醜情懷到酒邊。兒女英雄
皆本色。惜將絲竹遣中年。

綠酒銀燈水上樓。湘簾不捲最宜秋。怕聞折柳桓伊笛。誰識
迎桃子敬舟。浩蕩波光銷客恨。朦朧月影替花愁。隔湖絃索
殷勤弄。觸撥柔腸不自由。

淡煙輕粉事荒涼。尙憶風流說頓楊。南渡笙歌成好尙。東皇

花月寫文章。何來畫鷁衝波遠。幾見驚鴻隔浦翔。只有簾前
雙燕子。年年此處度秋光。
暮煙漸淡細波生。檻外嵐光畫不成。雙槩人來曾有約。六朝
山好半無名。銷磨年鬢緣多病。蕭瑟秋風未放晴。纔見湖邊
簾盡下。衫痕黛影自分明。

留別秦准

到此日無幾。別時情自生。潮痕常過岸。樹影半圍城。水碧留
人住。山青送我行。蒼煙斜照裏。願與爾同盟。
放櫂從茲別。垂楊縮客舟。煙波如有意。鷗鷺不勝愁。殘月初
醒夢。寒花欲殿秋。所思渺無際。相約待重遊。

夜坐

此夕風寒酒易醒。銀屏時見墮流螢。隔窗燈影涼於水。長夜

無人月到庭。

反遊仙詩并序

顧滌蠶師嘗作反遊仙詩。大旨謂殫霞餌玉通人寓
言。不如積碩學爲世用。僕本無心仕進。讀吾師詩。悚
然久之。自念秉才既弱。輒遭擯斥。蓬萊清淺。渺若登
天。設使浮榮有耀。而此中已搖。則平日所以自勵者。
安在也。至遁跡山林。或可藏拙。亦心鄙之矣。因亦作
反遊仙詩。以見志。仍用郭景純原韻。

鷓鴣林樾巢。鸞鳳枳棘棲。不見古達人。奮跡起草萊。叶長生
亦有盡。安事擬仙萑。抗心太虛表。躡足青雲梯。箴規莊惠友。
黽勉黔梁妻。操守苟不堅。局促決藩羝。置身固何若。當與冥
鴻齊。

衡華館詩錄卷一

靈秀在天壤。燕齊有奇士。著書宇宙間。邁迹雲霄裏。羞識黃石公。肯隨赤松子。謂彼終南山。仕宦捷徑耳。風流久不作。乘時當崛起。屈膝求寵榮。紛紛何足齒。南面擁百城。點筆任驅使。

草木托興微。春花何娟鮮。避世者誰子。藏拙處深山。仙叶何不勵志節。易轍而改絃。食必炊仁粟。飲必酌廉泉。榮華與彫枯。轉睫皆雲煙。學問存其人。道德誰仔肩。士貴希聖哲。緬懷千百年。

清操可長存。浮榮知易謝。蟲鳥變春秋。裘葛思冬夏。蓬島至蒼茫。桑田微變化。西笑向長安。願言稅我駕。獻策既不遇。且自安茅舍。窮則善其身。何事徒悲叱。朝市亦可隱。杖策思獨遊。貧賤洵堪恥。將泛皇都舟。豈敢驟

自進。金馬門可投。松柏勁寒歲。枇杷翠晚秋。滔滔斯世人。嘆惜誰清流。

文字固憎命。詩書能為災。此中貴自適。咫尺皆蓬萊。泉石不可託。奮步翔瀛臺。願預鑄洛宴。隨流飲瓊杯。典策獻天子。妙語解人頤。孩叶一旦置通顯。英名擅八垓。豈食不死藥。年老亦

反孩。管樂志有在。終非百里才。鉛汞即可燒。迂誕奪其魄。朱顏已非故。元髮倏變白。勳業不早建。零落隨蘿柏。陳篋發殘書。青編展日夕。至理挾精微。羣言盡瀝液。偉績著旂常。豐功垂金石。俯仰天地中。皆為寓居客。

秋月

悄剔銀缸結繡腸。秋風吹墮十分涼。水晶簾薄光難隔。翡翠

樓空夜正長。四野無聲寒。玉笛半欄斜影倚。紅妝離悵別緒情偏遠。但祝團圓。願早償。

不寐

烟蘿四敞風入冪。湘簾半捲月掛壁。不寐披衣夜深起。側聽空階殘露滴。

簾

怕有風時垂密密。更無人處護重重。日長已是少情思。睡起微聞花氣濃。

錦溪詩社小集。席次呈陳松濂孝廉

建豎壇坫伊誰功。拔幟立幟詞中雄。我來妄擊雷門鼓。森嚴壁壘偏師攻。席上更逢驕叔夜。注俊西冷茂世間孰識狂次公。處仲唾壺敲欲缺。抑塞磊落抒心胸。無才我自愧刻鵠。人

言此老其猶龍。屈服張華走成式。解經不窮戴侍中。邇年我亦懷述作。揚雲小技嗤雕蟲。快讀奇書固所願。敢誇健筆無不工。石鈹水沸春茗碧。蘿壁影搖蠻燭紅。人生如此致足樂。何必食粟千萬鍾。

冬夕

蕭蕭牆外竹聲乾。霜重樓高夢亦寒。人在西風正惆悵。又吹落葉上闌干。

夜起

夜闌夢醒人初去。起窺窓戶疑何處。高樹風寒鳥欲啼。空牆月墮天將曙。

無題

連日輕陰不下樓。花叢雨過濕簾鉤。隔簾蝴蝶雙雙見。剛觸

儂心舊日愁。

舊時庭榭尚依然。小別無端已一年。記得扁舟湖上過。岸花

落盡雨如煙。

樓臺寂寂雨浪浪。到此離愁總斷腸。相見千回皆夢裏。醒聽

落葉走迴廊。

剪剪西風透碧帷。近來消息斷聞知。不堪又到黃昏後。纔上

銀燈客去時。

門前絲柳帶寒痕。往事辛酸欲斷魂。無計著書且閉戶。藥爐

經卷度朝昏。

入春寒甚多雨

自入春難十日晴。連朝愁聽鷓鴣聲。晝沈沈雨疏還密。夜澹

澹燈昏復明。江上雲猶如絮厚。門前水又逐潮生。小庭花事

拚無著。要乞天公不世情。

一舸

惻惻輕寒淅淅流。又從一舸到江頭。鴛鴦並世難同命。蝴蝶

前生幻宿愁。若問桃花原未嫁。漫猜芍藥定相留。青衫淚點

紅箋字。此願難償分已休。

偶言小別感雙蛾。只爲情深怨亦多。隔岸鐘聲驚短夢。題裙

詩句托微波。鳳鸞消息常飄泊。蘭絮因緣慣折磨。簾外流雲

時作暝。薄寒猶著一重羅。

春來百感正茫茫。又著離愁更斷腸。伴我寒燈昏似墨。照人

殘月冷于霜。夢爲離別都成淚。魂入溫柔別有鄉。作繭紅蠶

多自縛。宵闌再拜炷心香。

紙閣蘆簾已有人。偏能借隱不嫌貧。明粧謝艷羞花比。翠袖

蘅華館詩錄

卷一

十五

張園叢書

蘅華館詩錄

卷一

十五

張園叢書

生寒倚竹頻。悔我多情徒自苦。憐渠小病豈無因。篋中猶剩
羅巾在。願寫心詞禮玉真。

蝶

如雨如煙夢裏花。卽非夢裏亦天涯。文章金粉終何用。身世
飄零空自嗟。萬里家山春已老。一生風月念多差。癡魂休戀
堦前地。咫尺簾櫳一半遮。

夢至青蘿山館

筇確行來石徑微。細尋舊路未全非。依然窻戶遮三面。記得
琅玕碧四圍。粉壁淋漓留醉墨。天風料峭上寒衣。黃昏小院
偏閑寂。澹月如絲照故帷。

棗花簾外落桐花。春晚光陰感物華。絕代嬋娟隱空谷。一門
詞賦盡名家。慧英女士詩樓臺楊柳青如畫。庭院芭蕉綠上紗。尙

記讀書臺畔坐。金經一卷誦楞伽。

春去

溫風闌雨信全非。怕見春從客裏歸。流水無情空采采。啼鶯
有恨故飛飛。棠梨舊館誰爲主。花月新詞唱亦稀。便是重來
時已換。玉樓人老綠陰肥。

鹿城歸櫂口占

夾岸微風解纜時。平橋小雨落帆遲。馬鞍山色渾如舊。每到
來游例有詩。

自花朝後至錦溪春杪未歸寄醒逋三十韻

寂寞錦溪路。蕭條淞浦濱。遠山青齧齧。淺水碧粼粼。橐筆情
無限。捻書願未真。交遊長契闊。世事劇艱辛。地僻賓朋少。邨
深風俗醇。庭花看盡放。檐雀喜能馴。檢點詩篇富。登臨景物
蘅華館詩錄 卷一

卷一

六

叟園叢書

新樓臺常倒影。魚鳥自親人。入饌思肥鱖。穿波采嫩莼。宵闌
搜舊帙。酒醒憶前塵。蹙往將三月。相思又五旬。飄零今已慣。
書札寄來頻。弱弟能勤讀。山妻不厭貧。簾櫳梳髻好。楊柳學
眉顰。同有羈棲意。且看現在身。文名窮亦損。友誼久彌親。徒
抱尊前感。彌傷別後神。屋邊叢樹暗。江上暮雲屯。我志甘沈
晦。君才善屈伸。歌詞媿曹植。筆墨壓陳遵。小飲攜蠻榼。相逢
岸角巾。丰標誠謬謬。氣象亦閭閻。夢裏空千里。雨中過一春。
短窓燈火闌。深巷犬聲信。尙未能逃俗。會將遂卜鄰。偶耕何
足道。偕隱豈無因。却病教丸藥。謀生愧負薪。芳時憐翫。古
道歎沈淪。池草碧於黛。野薔白似銀。嗟子處幽僻。往事爲君
陳。

初夏齋居卽事

一春掩衡茅。芳華倏已謝。及此櫻筍時。行廚會須借。了却數
徒課。偏得半日暇。簾外竹蒼翠。簷前花姹媼。籠錢杖頭解。濁
酒鄰家貰。聊持此一杯。以餞東皇駕。嘆息節物移。歲月許我
假。芍藥紅上闌。薔薇開滿架。行樂當及時。秉燭娛良夜。感此
意踟躕。獨坐短窓下。

前夜雨蕭蕭。春去苦不知。芍藥開何晚。石闌紅一枝。雨中色
更媚。折供古軍持。曉起忽相見。頓減昨日姿。因其已萎後。想
其方開時。榮悴固不久。遲暮深足悲。物當葆厥真。以全賦畀
資。一爲耳目玩。遂致失所宜。况乎春始來。物物若有私。轉眼
綠陰濃。枝榦嗟離披。人生亦若是。感慨以係之。秉質當自強。
莫被東風吹。

去年立夏早。今歲作詩少。爲惜時光過。偏多塵事擾。館中童

兩三垂髻皆幼小。吾媿爲人師。誘以理易曉。日月去堂堂。江
波隔渺渺。懸想我高堂。夢魂時相繞。傍牖雜花妍。入簾殘月
皎。醒來簷雀鳴。茶爐烟嫋嫋。

入夏方數日。天氣已驟熱。黃昏雨忽來。瓦上聲淅淅。輕雷若
有怒。電光乍明滅。夜深風更狂。欲把庭花折。芭蕉葉多捲。冬
簷痕應沒。曲港與溪通。池蛙鳴不歇。聽之不成寐。益覺客懷
劣。料知同夢人。擁髻亦淒絕。

夏夕不寐口占

永夕不成寐。懷人最可憐。簾鉤微有月。清影到牀前。

家大人客申江有感

接得申江一紙書。故鄉米貴信難居。但能飽喫殘年飯。自可
安休半畝廬。襖裏寒螿還四剖。篋中故物任三祛。余家三哥
倫兒所苦

硯田無恙書倉富。跛脚科頭好自如。

清閒我只羨農家。秋至籬邊開豆花。近世授田輕馬氏。年來
問字少侯芭。常懷短刺羞彈鋏。擬買良田學種瓜。便作邨夫
子亦好。那堪帆影又天涯。

渡滸清河遇雨

逢秋歷夏此徘徊。又遣扁舟載我回。驀地日光遮不見。漫天
雲氣鬱難開。狂風忽起欲搖樹。急雨未來先有雷。且看跳珠
入船裏。天公似把好詩催。

暫向垂楊繫小天。黑雲堆墨壓篷窓。木杓激蕩將吞岸。雨氣
迷漫欲滿江。瞥見來帆如過鳥。漸聞隔樹有鳴龍。吳兒解水
偏多事。水調新謳未貼腔。

初秋

微風拂拂過池塘。水蓼初紅菊未黃。教婦種花翻舊帙。呼僮
曬藥檢奚囊。窓前隨意開三徑。竹下偏宜置一牀。茶盞茶筒
渾細事。已堪斷送半生忙。
漸鶯疏鬢點秋光。一葉空庭覆井牀。跂脚看書燈可近。科頭
晞髮日猶長。宵闌聲寂知蟲苦。飯罷吟成思酒香。差覺簟紋
渾似水。天公一味作新涼。

問夢蘅病

無端薄病便添愁。骯髒情懷不自由。簾外有聲頻側耳。窓前
小坐自梳頭。即看鬢影蕭疎甚。還耐秋風料峭不。勸汝裝綿
須及早。新寒昨夜襲粧樓。

已是愁中復病中。起還無力臥偏慵。怕臨鏡檻眉痕淡。教下
簾鉤樹影濃。薄被初熏時有夢。長宵微倦忽聞鐘。請看羅袖

寒如此。懊惱年來帶更鬆。

感遇

空谷有幽蘭。其品軼芳杜。非無高向心。徒與衆草伍。孤萼孕
寒香。柔根託淺土。從未知媚人。亦非生當戶。竟以見嫉鋤。奇
冤抱千古。見之三歎息。瑤琴獨自撫。

鸞鳳翔天末。不與雞鶩爭。梓枏生山中。不共桃李榮。操守良
獨異。識見殊羣情。豈其溺名利。而與禍患撓。浮華固不久。要
共歲寒盟。惟以妒者衆。謠詠始叢生。材大乃被棄。品高終見
輕。既不爲世用。當自葆厥貞。

除夕讌集天風草堂。謹同滌盃師韻。是日立春。風雪寒
甚。

檐牙冰乳滴殘年。銀燭燒來照綺筵。柏葉杯中春似海。梅花

帳裏夢如煙。更闌正是談心候。歲暮猶虛繞膝前。

時家大人客海上

之申江途中作。

欸乃從茲去。人烟渡口迷。近村犬聲猛。濶岸水痕齊。舟小趁潮上。帆孤向日低。一尊成薄醉。有客歎羈棲。

春日滬上感事

海上潮聲日夜流。浮雲廢壘古今愁。重洋門戶關全局。萬頃風濤接上游。浩蕩東南開互市。轉輸西北供徵求。朝廷自爲蒼生計。竟出和戎第一籌。

蒼茫水國帶春寒。鯨鱷消餘宴海瀾。閭里共欣兵氣靜。江山始歎霸才難。殷憂漆室何時已。勸哭伊川此見端。遠近帆檣賈胡集。一城斗大枕奔湍。

烽火當年話劫灰。金銀氣溢便爲災。中朝魏絳紆謀畫。窮海樓蘭積忌猜。但出羈縻原下策。能肩憂患始真才。于今籌國詎容誤。爛額焦頭總可哀。

海疆患氣未全舒。此後豈能防守疏。應有重臣膺管鑰。早來絕域會舟車。上風誰補蠻夷志。波畢今登貨殖書。千萬漏卮何日塞。空談國計急邊儲。

自申江返里門

一水碧無際。扣舷正苦吟。郵多到家近。樹雜隱雲深。遙岸見山色。夕陽驚客心。昨宵歸夢裏。野寺斷橋尋。

懷吳江徐仲寶

簾幕愔愔地。燈光淡淡時。故人成久別。百里亦相思。多病惟綠酒。遺愁底是詩。梨花寒不落。春雨夢徐熙。

塵迹原如夢。歡悵不可期。著書徒覆瓿。閉戶且傾卮。春草繞
江路。疏花出短籬。宵深坐簾底。寒上髻邊絲。

春日茗香寮雜詩

紅護窻櫺綠護屏。薄陰庭院落花飛。長卿善病風懷減。小杜
工愁鬢髮稀。銀燭燒殘聽夜雨。金釵典盡到春衣。醅醪淺白
薜蘿碧。一樣春光總覺非。

飄零身世感人天。不識離憂不受憐。泡影幻成名士夢。鏡花
參破美人禪。酒懷跌宕思前事。詩筆叢殘入舊年。開到鼠姑
春已盡。嫩寒尙帶袂衣邊。

筆床安置近書牀。茶竈輕煙風自颺。簾底有人閒擁髻。晝長
無事靜焚香。花扶屐齒紅迷路。雨濕苔衣綠上牆。怕說神仙
多小劫。幾回蹀躞繞迴廊。

縱有離魂何處尋。銀燈淡淡夜沈沈。抱來碧海青天恨。同此
千秋萬古心。生不並時安間死。昔猶難見况而今。他年隔世
終虛願。只恨情深緣未深。

楊丈堃舸自蜀歸賦呈

萬行雲樹萬煙曩。鶻鴉聲中君正還。五六年愁多似葉。八千
里夢亂于山。途窮悔作諸侯客。境厄能凋壯士顏。珍重尊前
始團聚。夜深剪燭話迴環。

詠繡毬花次許玉筒韻

素面嬋娟怯嫩寒。聚花成雪護闌干。未圓明月慙相照。不散
春風併作團。巧構樓臺瓊錦簇。閒飛蹴鞠玉塵乾。天工別具
玲瓏手。剪出紗羅一例看。

落花次許玉筒韻

蘅華館詩錄

卷一

三

破園叢書

罷却千秋會。閒庭滿落花。深深荒徑濕。寂寂院門遮。低視鞋
尖鳳。飛粘鬢底鴉。前因渾似夢。和雨撲窓紗。

穀雨日於滌盦師家看牡丹。用羅昭諫韻

早起巡闌問。夙因東風一例作。深春。廿番若訊浮沈夢。四月
輕寒料峭人。開到名花濃似海。曉來微雨細于塵。絳帷別有
閒風趣。珍重尊前現在身。

深鎖

深鎖葳蕤隔幾重。淚痕已凝枕香濃。見偏掩斂如神台。日向
猜疑况夜逢。照檻月留前度影。隔帷燈瘦舊時容。芙蓉顛顛
藤蕪死。搖落秋風奪箇儂。

鹿城應試夜泊城外

秋風秋雨過危橋。水上寒燈獨客燒。舊事渾如春去鴈。新愁
多似暮來潮。舟人不語眠蓬底。殘月無聲墮柳梢。自是名心
猶未淡。明年相約看金焦。

鹿城旅邸夜作

銀壺漏漸不聞聲。四角秋紗八尺因。偏覺寂時蟲語苦。偶然
涼處簾紋新。還家夢短憐無迹。滿地月明疑有人。回首墜歡
渺難拾。半爲烟影半爲塵。

遊玉峰

約伴同攜濟勝具。寒衣共上玉峰山。山中寺刹荒涼甚。疥壁
新詩尙未刪。
容易登山復下山。迴頭挂笏看煙鬟。山靈也解留人意。一路
嵐光送我還。

讀曲歌二首

願爲蝴蝶禰。勿作鴛鴦帶。禰貼郎身邊。帶繫郎腰外。
樹下見郎來。拋个青梅子。郎莫嫌梅酸。妾心亦如此。

滌蠶師招賞牡丹先之以詩

剪風絲雨嫩晴天。疏鬢輕颺藥竈烟。猶戀殘春悲晼晚。昔因
小病負嬋娟。已知此日非前日。漫說今年勝去年。昨夜挑燈
眠不著。自題幽怨寫紅箋。

暫捲湘簾已惘然。更揩啼眼對娟娟。鼠姑半宿闌邊雨。鳩婦
猶迷柳外煙。濃酒比春容易醉。好詩如夢不成篇。朝來偏作
閑工課。手校羣芳譜一篇。

小窻鳥語惱人眠。鎮日思君倍可憐。如影如塵些子事。不晴
不雨奈何天。好花安用名香蕪。苦茗偏宜活火煎。咫尺仙源
倘招隱。未應索我買山錢。

宴後呈滌蠶師

天爲名花暫放晴。潑酷時節過清明。愁無今古消難盡。酒爲
嬋娟醉有名。時竹焙茶宜我輩。讀書識字見平生。昨宵簾影
燈光裏。不厭深杯一笑傾。

翻因病齒強爲歡。旣怕甜時又厭酸。已分花前拚蕉萃。不妨
窓底坐團欒。沈沈庭院沈沈夜。薄薄簾櫳薄薄寒。料峭衣邊
風未止。起携燈照小闌干。

春草

簾幙無心春滿庭。燒痕蘇後草青青。客袍歲歲慙相似。蠟屐
年年向此經。和雨和煙南北路。半花半柳短長亭。勸君莫問
前朝事。隋苑吳宮夢未醒。

此生

六扇窻櫺一桁簾。碧紗櫺外嫩寒添。無憑無據蛇醫褪。疑喜
疑嗔燕語尖。剛好別時花淡淡。最相憐處月纖纖。此生已了
他生未。懶把香臺玉鏡占。

紀夢

不知絮果與蘭因。簾冷紅粧鈎冷銀。月缺花殘惟有恨。酒闌
燈施更無人。明明記得終成幻。夜夜能來或是真。莫打黃鶯
莫喚燕。珊瑚枕上淚痕新。

蘅華館詩錄卷二

長洲 王 韜 仲弢

美女篇

長安春日麗。衆女相翱翔。生小同里閭。一姝宛清場。纖纖見
素手。娟娟曳羅裳。白玉爲環瑱。黃金爲釵梁。梳櫛薄蟬鬢。結
束墮馬粧。清羸憐顧影。善睐含明光。姊妹皆有婿。鴻鴈翩成
行。傾城詎獨棄。所貴持貞良。朝繡百蛺蝶。夜織兩鴛鴦。苟非
中心好。禽費徒相將。圓月倏已缺。好花不終香。區區何所託。
中夜起徬徨。

反白頭吟 井序

媚人有草。療妬無羹。不聞中山狼。嗥但聽河東獅。吼
舉世靡靡。古今一轍。余非敢姍笑。通人名士也。亦等

諸客嘲竇戲之流耳。則以此詩爲相如解穢。并作討文君檄可也。

鷓鴣比翼飛。燕燕交頸宿。微物尚如此。人乃違所欲。文君昔日奔相如。得託孳尾遂願初。相從中夜成都市。牛衣犢禪何足耻。曾回首憶成臯。消渴又到茂陵子。琴心琴心何忽變。新人未來故人賤。自家剛作長門賦。反道新人勝於故。象牀珊枕多恩愛。眉痕濃比巫山黛。茂陵女子那有此。相如是以能中止。不然白頭吟祇數十字。豈能倏忽回其意。或謂文君非薄情。一逢知己志不更。誓言儘託鴛鴦樹。移性祇求鸚鵡羹。啼紅泣綠嬌如許。性卽奇妒容可取。古來嫫母紛無數。何妨氣短胭脂虎。吾曰唯唯否不然。迴波栲栳徒相傳。奈教同抱文園病。無人參破美人禪。

小庭紅藥已謝。感而有作

剪風吹上碧窓紗。杯酒匆匆負歲華。今雨不來思舊雨。此花開後更無花。一春夢短辭粧閣。絕代人憐住小家。休怨韶光多寂寞。簾鉤正好月初斜。

風雨連朝。春光將盡。杯酒獨酌。輒復黯然。讀滌蠶師餞春諸詩。悵觸於懷。遂成長句。

前村鷓鴣夜呼急。簷雨如注疾。風疾。報道東皇今又歸。起看簾外花枝濕。娟娟啼眼不曾乾。雲鬟霧鬢倚闌干。木棉尚著袂衣薄。春愁送得留春寒。家人爲剪園中蔬。劇筍自攜鴉嘴鋤。鱒魚肥矣。鰕魚瘦。青青豆筴登槃初。忽枉詩篇成一束。急管繁絃指下促。嬋娟名士易銷魂。喚醒春婆夢未足。我今對酒憶前塵。錦瑟年華長似人。綠葉成陰空有恨。紅顏小駐豈

無因願將玉液酌冰老。羅敷莫便工愁早。一任天涯怨落花。
由他庭院生芳草。花開花落總尋常。春來春去何匆忙。年年
歲歲常如此。何必摧抑增感傷。君不見潘黃門行年三十鬢
毛改。又不見杜牧之湖上尋春遲十載。玉臺金粉半消沈。水
不西流遺恨在。

夜雨小集青蘿山館

時光櫻筍小廚開。折柬招吾聽雨來。窓底剪燈隣共話。席間
賭酒漫相催。詩豪終讓玉山主。量大何辭金谷杯。裙屐風流
今可繼。猖狂亦是出羣才。
毋戰爭先未敢誇。聯詩韻險限尖又。留春計拙人無寐。刻燭
吟成筆有花。先得驪珠還剩爪。不妨螳臂更當車。銅壺漏箭
休頻滴。競擘苔箋塗老鴉。

積雨

輕寒簾底燕初飛。早起溟濛雨漸微。阿母何勞搜故篋。十年
應不著生衣。

怕聽前村鳩婦呼。庭前半畝變成湖。水深聞說江魚賤。爭遣
兒童入市沽。

并少街頭屐齒聲。風狂雨急斷人行。朝來總覺炊煙重。遮住
疎林不肯明。

數處秧歌唱已休。水車漉漉決渠溝。低田漸見新苗沒。多少
農人相對愁。

樹陰濃綠壓簷端。風雨陰森入夏寒。壞壁半欹茅屋漏。又吹
急點上闌干。

徹夜沈沈簷溜懸。偏災何意厄今年。無田亦自愁飢餓。米價

朝來已倍前。

送楊醒道之杭州

惘惘出門何所之。可憐賤士爲別離。束裝躊躇不敢發。動足荆棘涕淚垂。不知此行亦快意。武林山水天下奇。清游自足飽閱歷。男兒豈在憂寒飢。要令吸盡西湖水。洗出胸中冰雪詞。君家外舅蜀太守。罷官已久囊無貲。仕宦不足救貧乏。向來廉操衆所知。今年吳中盛水患。眼見秔稻收無期。歲荒人情益劣薄。飢驅枉自東西馳。私冀浙俗或稍厚。戚友投贈能先施。送君行矣雨不止。泥塗滑滑行遲遲。莫愁所適寡諧合。且與君飲盡一卮。

雨中感事

一雨連宵且。蕭森夏似秋。三旬稀見日。五月要披裘。晴霽猶無望。霖霖未肯休。天心究仁愛。可慰杞人憂。

但覺晝沈沈。涵空水氣侵。風高雲色厚。晴薄日光陰。已抱憂飢歎。徒深望歲心。江村成巨浸。遠近起哀音。

淮南聞水漲。幾處集流民。鴻雁同飄泊。關河多苦辛。艱難籌義賑。飢溺軫皇仁。滿目流離者。三吳近亦貧。

頻歲桑麻絀。今年秔稻無。偏災連郡縣。高漲失江湖。賑粟愁官吏。探丸恃黨徒。撫綏司牧事。誰繪鄭監圖。

歲歉人情薄。民飢性命輕。米船何日至。市價未能平。波向林間湧。船從岸上行。此鄉真澤國。輸世早籌衡。

溝洫疇循古。隄防法本疏。沮洳爭曠土。橫決失歸墟。媿乏年荒術。空談水利書。終朝閉門坐。嘆息此窮閭。

自海上寄醒道

竟與君相別。扁舟滬瀆行。暮雲低作雨。涼雁悄無聲。葉落樹猶密。水寒波亦平。芙蓉不可折。遙見故人情。

江水渺難涉。江花寒欲凋。湖山見真相。文字破無憀。骨肉悲情極。功名熱念消。浦東雲樹裏。目送客帆遙。

我爲斯行役。相憐亦有人。寡言緣作客。多病倍思親。春枕潮來夕。喧簷雀及晨。蕭然窓底坐。近况那堪陳。

尊酒懷諸子。寒燈客遠途。歌呼猶昨日。憔悴奈今吾。桐葉客中落。月痕夢裏孤。嗟君不得志。同是爲飢驅。

蹤跡偏隅滯。登臨感慨多。鄉關不可望。風雨有誰過。高會非詩酒。佯狂託嘯歌。閉門祇蹇臥。示疾似維摩。

簷網窻塵裏。茶爐颺篆烟。無貨服苓朮。多感廢詩篇。衣食愁貧歲。艱辛厄盛年。天涯倘相憶。見此應凄然。

口占

冷雨疎風獨掩門。客中臥病與誰論。一燈窻底還家夢。愁聽荒雞啼遠村。

除夕集天風草堂謹同滌盦師韻

風雨寒江阻客船。虛堂燭影對娟娟。莫談往事皆如夢。自有前因休問天。浩蕩行程游子淚。蹉跎書札故人憐。今宵杯酒殷勤勸。暫屏清愁且學仙。

悲秋曲

悼楊碩人也。碩人沒於庚戌九月。越一年追悼作此。西風乍起寒惻惻。疎簾細雨昏如墨。非因病酒黯傷神。只爲悲秋無氣力。往事零星觸緒來。淚痕沾臆心先哀。四年聚首纔一瞥。柔腸半刻有千迴。憶昔新婚偏早起。晚窓不把殘粧

理長眉慵畫遠山青。雲鬢亂插春花紫。片帆我作錦溪游。錦
溪十里波如油。踈地垂楊不堪縮。可憐粧閣帶深愁。鄉夢迨
迨江水隔。偶然見面歡何極。睽違容色未能歸。翫懣情懷空
自禘。謝家庭院落楊花。垂髻嬌女語牙牙。已能覓窠偏憐母。
亦解翻書慣惱爺。其時我已旋閨開。歡娛不覺星霜換。小飲
窓前鬢影斜。獨行牆畔花陰亂。詎知事變本無常。一家骨肉
盡慘傷。痛殺高堂已垂白。劇憐遠道走蒼黃。蒼黃又放江邊
櫂。暮煙漠漠風峭峭。怕聽寒夜長。新潮愁望故鄉懸。夕照江
邊。就得兩間廬。扁舟載得來偕居。拈鍼鎮日閒挑繡。擁髻終
朝伴著書。訛識無因到梓里。關心手足驚何已。忽忙一舸促
雙歸。離別三番成九死。別後情懷更不同。相思顛倒夢魂中。
盡將客緒織雙鯉。懶把家書付雙鴻。雙鴻雙鯉傳來便。夏尾

秋初未相見。浪說懷中已有鱗。又看秋末將歸燕。秋深况是
月團圓。薄薄羅衣耐早寒。新悟因緣真有限。那知憔悴竟無
端。我爲此事常悒悒。汝不能來我難往。極浦烟迷斷數峰。長
堤人去划雙槳。忽然雙槳到江頭。一朝握手淚先流。對我強
權開笑口。厭人喚起下簾鉤。棗花簾外西風透。慙慙不語憎
長晝。自識宵來夢渺茫。始驚鏡裏容顏瘦。瘦來骨立似香桃。
塵滿粧臺翠黛消。小病已深猶自諱。長宵不寐更無聊。無聊
側聽啼螿急。閒塔微雨窓紗濕。欲到家時空斷魂。未成仙去
先絕粒。沈沈一病入膏肓。從此凄然不下牀。豈有靈蘭誇妙
術。空傳海上返魂方。嬌喘如絲頰訣別。此刻肝腸幾寸裂。欲
言又止意纏綿。掩泣無聲聲哽咽。阿母聞知心更悲。吳門鼓
櫂來非遲。彌留一見不能語。喚汝千聲微有詞。桐樹半枯木

葉下。玉釵已折羅裙化。偕隱難期白首歸。長離早把青鸞跨。
院落天風響佩環。人海茫茫永不還。銀燭窓前明昔昔。舊衣
架上鬢斑斑。殘燈孤館真淒絕。迴廊獨自尋踪跡。熏爐香冷
颺空幃。繡榻塵多遺墜鳥。空闌小坐易黃昏。愁疊重衾見血
痕。寂寞閒庭花影謝。叢殘遺篋藥囊存。一棺送汝東郊去。含
酸獨立悄無語。最憐孤鳥不成鳴。底事宵長未肯曙。淒涼無
計作悲歌。零落天涯怨更多。半盞濁醪營薄奠。一鉤殘月掛
藤蘿。此生自分青衫老。離憂雜起多於草。已了前因哭枉然。
難填癡願潛身禱。冥通幽感隔重泉。經案繩牀度歲年。此情
亘古無終極。爲作招魂賦一篇。

從兄竹筠至海上

此來曾不意。相見各凄然。生死家門淚。辛酸骨肉緣。支持逢
歉歲。一泊感華年。明日愁分手。寒途慘暮煙。

移家滬上作

瘁葉悲隕樹。病鳥愴離巢。豈余非人情。甘作秋蓬一少小。慣
爲客。里居多無聊。今茲遠鄉縣。獨處耐寂寥。顧念白頭母。憂
子心恹恹。更憐小弱弟。久已詩書拋。吾躬事叢集。此舉敢憚
勞。日卜一廛宅。塗茨爲誅茅。

昊天胡不弔。鞠凶丁我躬。葛帔走風雪。忍飢敢言窮。一朝落
海上。夫豈由余衷。根本詎弗重。鱸膾何由充。嗟予事大舛。磨
蝎在命宮。動如金躍冶。嘲誚叢吳蒙。豈有伯通廡。令我安賃
春。因之決行計。仰視寥天鴻。

我家居里中。及今閱三世。卽我住此廬。亦已逾十歲。先人立
門戶。辛苦心力敝。前年遭大水。研田絀生計。含淒急出門。倉

卒麻鞋繫門祚感衰微。骨肉驚飄逝。庭樹色依依。對之屢揮涕。再拜從此去。銜哀告家祭。

送夙葆初歸閩

讀書須識忠孝字。閱世當知經濟事。夙生抱負異凡庸。空懷耿耿平生志。飢驅來作江南遊。出門便爲衣食憂。男兒在世不得意。徒以箸述期千秋。自我識君在己酉。兩世交情覺更厚。偶參西學析微茫。時於講席解紛糾。側聞草澤徵賢才。特詔元戎幕府開。羽書嶺嶠連朝急。鼙鼓湖湘動地來。滿眼烽煙天地小。扁舟歲月江湖老。淚落雙親念故鄉。片帆遙指閩中道。閩中學術素推崇。魁儒碩彥餘宗風。夙生窮經向所習。李常而後此抗踪。此才豈合長貧賤。報一國心肝終不變。叩閣欲上萬言書。對策羞爲三語掾。江南十月天氣寒。西風送別臨江干。鳳一消息長相憶。此去滄溟縱羽翰。

擬杜諸將

狂飈徧撼粵西東。極目烽煙感慨中。北控雄關當虎豹。南征甲士慘沙蟲。誰先薪突陳奇計。空向疆場策戰功。今日燎原嗟已及。會看勝算出元戎。

南來消息動驚疑。北去羽書日夕馳。世亂頑民輕鬥殺。時清司牧寄安危。皆言裴度能平賊。又見班超重出師。欲挽銀河洗兵甲。功成旦暮奏軒墀。

朝廷節鉞重專征。願竭忠貞答聖明。空灑渡河宗澤淚。同傷臥病武侯營。大星已向三台落。青史徒留一代名。自古湖湘爭戰地。誰能控扼用奇兵。

鼓角如雷動地來。氛纏三楚肆奇災。襄樊險塹成孤注。褒鄂

威名非將才。坐使擁兵全局壞。安辭疎寇暮營開。似聞早下
賢良一詔。應有徵書到草萊。
徵兵轉饒日駭然。運會艱難事變遷。投筆終軍思報國。上書
卜式助輸邊。幻吹妖霧迷三里。潛伏凶機近十年。將帥卽今
天下選。要憑一廟畧計安全。

聞客譚近事有感

男兒生不必封萬戶侯。死不必崇千尺邱。但願殺賊誓報一
國。上紆一當宁南顧憂。不然坐籌幕府出奇計。凶渠自請長
繩繫。功成長揖歸里閭。自此絕口談經濟。當今潢池兵氣驕。
騰天妖火驚江濤。一朝廷出師重民命。連營客將徒逍遙。軍
中久望廉頗起。旌旄未至身先死。一代勳名哭偉人。千秋議
論空餘子。堂堂經畧營門開。養威持重稱將才。危城賊騎繞
三匝。連驛羽書催百回。兵事一悞堪再悞。雄關如此竟飛渡。
眼看豺虎可成禽。坐擁貔貅猶不赴。八日圍風雨愁。此係
天意非人謀。保全幸得九重喜。軍報俄傳失岳州。岳州自
古號重鎮。管鑰實司南北命。一朝形勢失所據。江漢紛紛告
兵警。國家昇平二百年。廢弛武備疏防邊。可憐萬衆苦鋒
鏑。何時四海無烽煙。一身飄泊長天地。敢以龜才輕一試。蕭
孃呂姥彼何人。若輩徒壞天下事。

顧師書來知蟬叔世弟之殤寄輓三首

慘殺驕兒死。瞻依僅五年。達人方自艾。極憾總難填。索環窺
耶意。擎花得母憐。而今成底事。一夢付秋煙。
記得纔周晬。堂前一見之。已能將筆弄。略不近兒嬉。淪謫歸
嫌晚。聰明厄轉奇。敢憑山簡語。草草慰吾師。

秀骨原無匹。瑤枝定較長。頻年罕見面。到此劇迴腸。凍髓絨
哀册。燕鴉泣夕陽。何時重載酒。入室話淒涼。

題寄願師淚海集

驚鴻夜逐寒潮起。海角羈縻念鄉里。吾師遠道寄書來。點點
斑斑血滿紙。歌詞紀事痛難名。傷哉又喪西河子。我亦時常
淚不乾。一年一哭家人死。先君子沒後。越一
年。室人夢備。又平。昔游苦憶玉山
堂。蘭摧玉折悲何似。九州縱覓返魂香。萬古難回東逝水。金
環莫再問還來。露電泡影須臾已。情天總付一劫中。方知佛
氏無生旨。

題秋燈讀書圖

小閣疏簾耐夜涼。一絲燈裏漏秋光。宵闌吟罷無聲句。落葉
聲乾走暗廊。

滿林風雨暗模糊。展卷焚香與未孤。怕踏歐陽老窠白。不教
人寫讀書圖。

雙壁行贈延陵兩公子

草堂方報梅花開。今朝吳質翩然來。握手歡迎爭倒屣。淪茗
小坐重徘徊。阿連昆季皆俊秀。前身應是謫蓬萊。文章並美
稱雙璧。姓字聯輝著八垓。闕門籙俊珊網濶。方今濟時需奇
才。英姿競爽廟堂器。交柯珍木非凡材。君家觀察蒞茲土。民
風丕變俗敦古。去年禱雨屢焦勞。分明愷澤及豐父。堂前相
映看璧人。塔下成行祭玉樹。雙丁兩到已足誇。况兼三鳳尤
能舞。若從兄小
峰亦為才和鳴雲路爭翱翔。秋高俱展凌霄羽。竭來省
親到瀛壖。高軒過我快先覩。入春七日景物新。春風識面偏
相親。鹿麕自憐仍故我。扶搖直上豈猶人。佳士鳳毛可無魏。

世家麟角自有真。卽看一舉得高第。定知早歲稱詞臣。跨馬
京華去射策。多少青雲逐後塵。芙蓉鏡裏聯花萼。珍重泥金
報我頻。

至吳淞訪周丈不值。卽用其壁間元旦詩韻却寄。

飢驅出門走。久別故園竹。枯蟬時禁聲。寒雀噪晨旭。况復遭
亂離。空把昇平祝。江山歎陸沈。庶幾天心復。民戶多流亡。漸
不充饘粥。書生百無能。反飽侏儒粟。扁舟海上歸。倉卒換時
局。問道問淞濱。春事轉紅綠。訪君旣不遇。又嗟塵網縛。中流
繫戰歌。慨彼楚氛惡。何年息壤盟。及時而行樂。

四月六日集沈氏偃鶴山房。同人李壬叔將劍人孫笠

舫分韻得酒字。

吾與休文交。曾不二年久。落落眼中人。瀟城大如斗。乾愁不

出門。行樂復何有。消閑一卷書。排悶百壺酒。今春忽已過。笋
老不適口。亂紅擁萬花。濃綠圍衆柳。時光滿眼非。招隱共良
友。蔣詡天下士。李頎世無偶。韜也雖不才。未敢居人後。今日
集此堂。小飲輒及酉。酒酣愁更來。豈曰掃愁帚。方今寇氛惡。
騷擾遍淮右。六代好江山。竟作豺虎藪。我輩徒經生。誰能展
一手。毋笑孫樵癡。常思歸隴畝。孫若有歸耕之約市上問荆高。吾其
爲屠狗。

題焚香讀易圖

近世談經九十家。徧搜奇字學侯芭。無言危坐參真諦。不問
庭前有落花。
乍寒微雨入疎簾。香燼熏爐嬾自添。消息箇中誰領畧。東風
袖手一巡檐。

夢裏三爻曾徧讀。今朝展卷費凝思。從旁拍手應相識。卽是君家玉雪兒。

夏日閨中雜詠

多病多愁強自寬。不情不緒更無端。宵深枕簟渾如炙。願祝蒼天六月寒。
蠹書仙窟寄閒身。紈扇初題墨尚新。新著單紗還怕熱。細揩香汗避生人。
疏桐陰底小庭幽。簾外溟濛雨未收。涼殺夜深花影瘦。海棠先帶一分秋。
塔前小立晚風微。花影都隨月上衣。玉骨自憐無一把。比來還算菊花肥。

海上歸留宿笙村孫氏舍

吾識孫樵久。躬耕返一林。十人滄海水。重見故園心。鷄犬田家樂。桑麻野趣深。江鄉足風景。卜宅費沈吟。
養病容高枕。茲來亦有因。閉門思種菜。臨水愛垂綸。何必嗟游子。偏宜號散人。相期爲小隱。祀菊作比隣。
全家歡見面。團坐話深更。屢作還鄉夢。彌傷別母情。江村還足食。湖海未休兵。暫息征人轍。歸耕志未成。

笙邨紀夢

萬種相思一紙緘。鶯鶯四角寫迴環。約來眉閣初三月。身到銀河第幾灣。見面分明非夢裏。言情縹緲豈人間。珍珠密字從頭讀。背拭啼痕慘玉顏。

靈簫墨會託神仙。今夕相逢休問年。事到難言卿自解。容誰可比我猶憐。花間玉笛涼無語。枕畔銀燈照不眠。碧宇紅墻

原咫尺。重來未必隔人天。

重紀夢

夕陽樓閣易昏黃。深鎖歲華隔畫堂。紅印私疑消蜴蜥。綠陰還許覆鴛鴦。重來花影迷崔護。再熟胡麻賺阮郎。一度相逢一惆悵。歡娛轉自蕩迴腸。

不隔青山隔絳河。中間淼淼逗微波。團樂時識今番誓。離別憂從前度多。詩到無題託花月。人原絕代住煙蘿。鳳鸞消息天涯遠。翹首靈脩問若何。

新秋卽事

雲近天河畧作波。年年今夕恨如何。湘簾涼月移花影。團扇西風卻畫羅。紅蓼江頭知信早。碧梧院落聚秋多。鬢絲漸欲如潘岳。禪榻從渠懺酒魔。

簡胡舒塘廣文

同作瀛壖客。無嫌過從頻。談經搜秘笈。講學重先民。薄俗輕文字。雄心擾米薪。嗟子滯羈旅。牢落處風塵。

送麥西士回國

創調驪歌海外行。迢迢七萬里行程。潮從黃歇江邊熟。月自袁公壘畔生。花底禽言添別恨。樓頭琴語帶離聲。二女公子皆善操琴撫今追昔無窮意。更著天涯兩地情。

知己平生首數公。海邦物望最爲崇。學從天授推無敵。道自西來證大同。有魏龕才憐阮籍。不將奇字詫揚雄。八年聚首情如昨。歲月因循感慨中。

海雲黯黯水舒舒。慘淡離筵判袂初。飄泊自傷遊子淚。蹉跎未報故人書。謂美君魏茶仲宣無主難爲客。鮑叔貧實感子此。

後登樓倍惆悵。高梧葉落景蕭疏。
某邱某水記來偏。憶著童游應惘然。故國河山如昔日。中原
烽火靖何年。從公欲作褰裳想。避世誰爲招隱篇。滿眼亂離
無可託。歸耕未蓄買山錢。

題間日讀書圖

世間好事那有此。得閒蕭然讀書史。男兒在世事業多。安肯
低頭鑽故紙。平生學劍愧無成。弄此毛錐亦足恥。我少卽爲
衣食驅。十年辛苦徒勞耳。殘鱗滿篋久生塵。不識一丁快無
比。賣書何能易米炊。煮字終愁飢餓死。君曰唯唯否不然。不
讀書豈成佳士。部居甲乙分後先。偶著丹青我所喜。夜闌展
卷自吟哦。燈影搖紅墨痕紫。要讀人間未見書。縱橫駢錯辨
疑似。不屑沾沾鬼國冊。以此弋第誇鄉里。我聞君言意爽然。

士各有志惟其是。文章經濟從此出。學同術異良有以。還望
他時載酒來。共讀南華研至理。

遊東洞庭山

揚舸東下太湖濱。躡石登臨眼界新。不斷煙波千頃遠。無一
蒼翠四山春。羣峰合沓疑無路。絕島蒼茫未見人。更上莫釐
最高頂。狂風吹折郭公巾。

是日余帽被風吹去

過第二酸齋小飲

突兀離懷借酒傾。憂時常覺客心驚。連天鼙鼓紅顏老。滿地
江湖白髮生。哀樂中年託詞賦。亂離斯世薄公卿。一杯入手
休辭却。請看功名馬上成。

同竹盦松軒買舟至海上夕泊新興鎮

結伴同尋海上居。晚風飄拂蕩襟裾。去家卅里鄉音改。作客

頻年豪氣除。亂世文章空。賈禍憂時經濟孰。陳書無聊且倚
篷窗坐。剪燭清談興有餘。

病足歸里呈顧師

養病歸來已廿旬。窮鄉風雨困斯人。半人將作習鑿齒。惡疾
幾同盧照隣。剩有殘書盈我篋。竟無良藥治茲身。里中咫尺
難相見。何日追隨杖履春。

寄許起

衡宇相去僅二里。岸巾枉過祇一回。徒因疾病我難往。倘無
風雨子可來。文字不奇豈作祟。科名無分竟爲災。南鄰若遇
顧夫子。好把新詩特地催。

呈顧滌盦師同許起韻

許子玉簡見脈倡和之作。并索繼聲欲遣茗兵以作

瓜戰壁壘整暇。意將壓晉軍。而陳韜多病廢詩。已無
攘臂態。作壁上觀可也。因念吾師悼亡哭子。頻有所
悲平原歎逝。子山傷心。兼而有之。哀感實深。不能無
詩。非以慰之。更益愁已。

海上帆歸暮雨斜。經年病足等匏瓜。只因妨藥勸除酒。那得
支筇行看花。三十頭顱遲著錦。尋常詩句敢籠紗。平生無限
傷懷事。背倚闌干手獨叉。

搗門叔重日初斜。

謂玉筇

解暑慙無一片瓜。奇字行間微帶

草。新詩筆底欲生花。纏綿情比同功繭。宛轉心如方空紗。歎
逝傷離更癡絕。虎頭垂老哭途叉。

玉人舊住玉鈎斜。待聘年華正及瓜。誰料同心空有結。生憐
薄命始爲花。神仙小劫埋黃土。風雨無情守碧紗。我亦遣愁

苦無策。聊拈險韻鬥尖叉。

哭子傷心淚點斜。黃臺四摘已無瓜。囊中自配君臣藥。庭畔

還餘姊妹花。缺月雲邊依舊樣。所殤九弟西風扇底冷秋

紗。九弟生時師夢人贈以紙扇未秋而捐其兆已見嗟予更抱無錢歎。錢盡空藏玉

局叉。

再呈顧師仍用前韻

前詩甫竟玉筍又復疊均見。眎有角逐詞壇未知鹿

死誰手之語。

看月西窓圓復斜。櫻筵已過又嘗瓜。砌苔滑屐乍經雨。鄰樹

當窻初著花。銷夏詞填隨赤牘。招涼幃更撤青紗。年來自懺

緣多病。老母持齋禮木叉。午涼冰簟紈紋斜。睡起家人供藕瓜。辟暑誰能心似水。看書

自幸眼無花。濕雲壓屋作微雨。涼月入窓透薄紗。欲賦閒情

擬潘岳。豆棚小坐展丫叉。

校校野田一徑斜。思量學種廢侯瓜。閒中書卷愁一酒。門外

桑麻屋後花。從此閉關編赤雅。何須側帽羨烏紗。不知此願

何時遂。慟哭佯狂路更叉。

寂寞門庭蛛網斜。誰歟憐我肯投瓜。依人好似社前燕。閱世

真同鏡裏花。酒債未償書藥券。春衣已盡典秋紗。南鄰堪羨

蹙和尚。檣步還能攜一叉。

滬城感舊有序

春中浦上浪跡八年。問柳尋花間有所屬。自患足疾

絕不復問此中人矣。今歸里門鬱伊寡歡。追念綺遊

真如夢幻。宵闌月黑。觸緒紛來。玉溪錦瑟。樊川綠陰

兼而有之。悲感竊深。用寫之詩。所謂斷腸人遠。傷心事多也。仍用前韻。并索玉筍繼聲。

藥爐烟裏鬢絲斜。禦濕還宜製木瓜。久已冥心思學佛。安能抱疾再尋花。新詩索署裙邊字。醉墨留題壁上紗。昔日綺遊今始悔。迴腸百折念千叉。

此是銷金舊狹斜。餽金愧乏一瓶瓜。叅來梵眼筵前笛。散著天魔袂上花。水國嬌娃屯畫艦。蠻方中婦障輕紗。爲才已分江湖老。天遣飄零温八叉。

朱樓曲院道旁斜。碧玉韶年初破瓜。願作小星比桃葉。自憐薄命怨楊花。二分月上三層閣。一寸心通六幅紗。沙叱飛來人面改。重尋香路恨多叉。

移居城曲板扉斜。亂後音如斷蔓瓜。已不再圓今世月。可能

重見此鄉花。荒涼殘照昏頽壁。冷落流螢點畫紗。一度經過一惆悵。小橋欹側老藤叉。

有感寄紅粧閣內史仍用前韻。

一曲清溪略彳斜。自芟密樹引棚瓜。悲涼身世嗟空谷。骯髒年華怨落花。秋後新愁多似葉。宵深好夢薄于紗。斷腸詩賦傷心句。何必閒吟手待叉。

天涯海角片帆斜。珍重傳書並饋瓜。禳病替郎鈔貝葉。遣愁教婢供楊花。思裁春勝搜紅帖。愛貯名香繫絳紗。窓列峰巒眉黛綠。亂山影裏路排叉。

偶賦閒情點筆斜。石闌小坐供茶瓜。團欒怕見窓西月。歡喜空開堂北花。今世緣難重合鏡。此生事悞已裁紗。紅鈴小字私封好。自剔寒燈倚玉叉。

土牆茅屋竹籬斜。蔬食登槃慣食瓜。小住悔教留絮果。重尋
幸未失桃花。秋霜著樹紅于茜。香霧濛窓黑到紗。昨夕分明
郎入夢。私拈鞋卜禱羅叉。

題江弢叔小象。卽送其之官浙江。

四十年華過。詞章愈斬新。抗心希古哲。俯首爲衰親。亂世多
奇士。窮鄉見此人。平生飛動意。相對各沾巾。
海內頻聞警。羽書數驛傳。馳驅連遠道。哀樂逼中年。伐叛紆
籌策。饑軍急稅錢。吾謀已不用。終讓祖生先。
長策今誰畫。偏才世亦奇。文名動江左。末契托羣兒。空著憂
時論。且芟憤俗詩。家貧親老矣。薄宦急營貲。
相期爲小隱。所幸是卑官。閱世心知少。論文眼界寬。罪言誰
我諒。痛哭更無端。復作臨期別。詩成把劍看。

慰舍弟詒卿悼亡

弟婦夏氏柔淑。知書。娶未三載遽以疾殞。年僅二十
有二

昔我年廿三。鼓盆遽召戚。今汝年廿四。彈琴復中絕。年若境
亦同。哀情愴中隱。汝媿在異鄉。淒涼誰慰恤。汝婦在故里。經
營尙稠密。值我病足歸。摒擋事易集。笥篋已頻搜。有無盡吾
力。支持門戶難。十載驅衣食。汝婦出名家。詩書原素習。富固
非我倫。貧或堪相匹。自從入門來。婉婉知淑質。伴讀荒邨中。
孤燈耿斗室。冬寒夏苦熱。亦足釀痲疾。不意短姻緣。明珠入
手失。罡風花乍萎。冥霧月爲黑。宵闌成此詩。知汝哀惻惻。

聞粵警

住世難逃世。桃源亦戰場。亂離無樂土。烽火又蠻鄉。小築延

朝爽幽懷送夕涼。海氛雖甚惡。去矣趣行裝。

時余將之滬上

小燕蘭語樓。明珠校書。索贈新詩。酒闌燈炮。更盡香溫。別有根觸。走筆得七律五章。書之金篋。并寫寄天涯俾領畧一段愁况也。

見便合羞別便思。多情轉悔識卿遲。已虛別浦迎桃葉。合向章臺問柳枝。擬託鴛鴦通綺約。好修鴛鴦寫盟詞。酒邊夢裏真愁絕。風味年來只我知。

曲巷閒門阿那家。香塵門外走鈿車。風流心性工題葉。骯髒年華感落花。故里蕭娘成陌路。窮途王粲久天涯。青衫自有辛酸淚。忍向筵前聽琵琶。

便擬溫柔老此鄉。不愁才少恨情長。綠甌春夢三生果。紅豆秋心九曲腸。多恐前身是明月。由來小字號珠孃。迷香洞裏

今纔到。準向花叢醉幾場。

已教孤負夙生緣。晚晚春光總自憐。有約玉簫成影事。無題錦瑟悵華年。難將恨石填深海。誰把情雲補漏天。今日看花倍惆悵。髻絲輕颺藥爐烟。

翠袖香消帶薄寒。熏爐斜倚撥灰殘。只緣情種生愁種。肯爲新歡失舊歡。小別忍教長訣絕。此生合與永團圓。恩深義重難忘却。梅子中心本自酸。

題改琦所畫仕女圖爲胡公壽作

背手東風有所思。心情未許等閒知。燈前人影簾前月。閒煞黃昏小立時。

十年影事渾如夢。四月輕寒猶中人。一種閒愁深似我。閉門無計可留春。

獨坐小窗見風吹落葉。忽然有感。因成一絕句。

目憐早插紅塵脚。帶水拖泥骨未仙。陡覺靜中微有悟。風吹一葉墮庭前。

連日陰雨。鍵戶不出。得二絕句。

濃陰樹底閉門居。剝啄無聲睡起初。獨坐雨窗無箇事。調羹手自補殘書。

不是攤書便攤飯。焚香掃地斷聞根。王郎懶散從今甚。似海鶯花不出門。

顧師寄示七律一章。獎勸甚至。謹步原韻奉呈。

不工文字不爭名。潦倒羸疎了此生。四海無家惟有淚。十年豈意作孤行。人為宕子求閒境。詩入商音失正聲。骨相窮愁心性懶。敢言吾業竟能成。

校書明珠。微患慍。祇戲贈一絕。

酒半留髡夜未央。羅襦偷解玉肌涼。荻蘭橋畔春風軟。那識銷魂別有香。

徐大以海上賣藥圖乞題。書二十八字歸之。

病足三年倒篋箱。囊中只賸宿春糧。平生嘗遍人間藥。要乞留侯辟穀方。

寄楊三醒道

花開不見楊汝士。憶著家園興味孤。病裏去年強作別。交春書札一行無。

茗寮書所見

啜茗南園趁晚晴。眼前驀地見傾城。夕陽小閣東風峭。苦耐輕寒只為卿。

時余忘著半臂。入坐寒甚。

入夏久雨。麥爛米貴。閉門養病。作此遣愁。

平生所過境。強半付亡遺。詩筆經春嫩。離情因雨孤。年荒難

自活。酒費久停沽。愁見家人告。明朝米又無。四月雨中盡。卅年愁裏過。屐聲深巷冷。蝸篆古牆多。燈影涼

於水。簾紋暗不波。乞晴苦無策。閉戶作維摩。

戲寄孫澄之廣文。寒煙尚宿曉模餽。剝啄柴門懼索逋。欲乞孫郎書債了。研螺

且寫調錢符。今朝又是花朝了。今日詩成酒未酤。偶憶孫郎多諾責。酒錢

還肯送來無。

記李七壬叔所述語。大道久凌夷。厄言患日出。福音從西來。一變佛氏說。佛氏戒

殺生。西儒尤斥絕。謂人萬物靈。養生正資物。生物本爲人。供

我無不足。殺以飽口腹。詎得曰饕餮。昔有艾約瑟。談佛善闢

佛。艾君字勉。謹英國人。著有釋教正誤。偶詣國清寺。與僧成面折。兩爭未得平。

僧笑其詞拙。援譬以通情。人物兩相繫。猛虎居深山。搏人以

爲活。天生人於世。豈亦爲彼設。虎念或如斯。子言殊未必。艾

君置不答。頰頰詞已竭。李子歸述之。使我解糾結。戕生固非

仁。放生究亦失。鮮食古所稱。特殺乃善術。儒生治內心。忠孝

根。惻怛。偶惜物命微。豈足爲口實。爲政綜大綱。茲事特瑣屑。

生殺兩可得。何暇爲辨別。一笑烹伏雌。且以樂今夕。

應試鹿城。過馬鞍山下題壁。

頭顱三十不成名。竿木逢場悞此行。重見故山餘涕淚。喜從

老友話平生。文章憂患兵戈感。身世悲涼兒女情。何日買田

容小隱。好尋溪畔結鷗盟。

夜宿獨悟齋

紙窗浙瀝不成寐。古室獨眠夢易驚。晷見月光爲雨奪。偏憎
燈蕊共愁生。僻居閭巷猶安樂。多故江山尙戰爭。一夜孤衾
寒似鐵。醒開兩眼聽雞鳴。

偶過第二酸齋顧師剪燭命酒卽席有詩謹和原韻

春來百感總無端。拂面東風尙覺寒。佳節漸從異鄉老。門生
直作故交看。十年放逐羞雞鶩。一輩飛騰傲鳳鸞。同學諸君
多不賤。爭誇西笑向長安。

三月二日顧師將設小醮招友石三丈及諸同人作竟

夕歡先呈一詩以誌感卽用其簡友石詩原韻

契合襟期得未曾。勞炊雞黍集賓朋。買田故里虛籌畫。負米

天涯闕斗升。客裏光陰多感慨。酒邊意氣尙飛騰。春寒淒絕
關千側。催放庭花知不能。

醒逋招飲獨悟齋酒後追悼嚴規生并示醒逋

此夕銜杯大是難。昔年朋舊半凋殘。燈前各訝形容瘦。地下
應憐風日寒。不識何時重得見。忍教相對渺無歡。歌離弔逝
真淒絕。兩袖沈瀾淚未乾。

人天渺渺斷知聞。花月淒淒已夜分。一別西風嗟隔世。重來
宿草哭秋墳。死無後嗣知君痛。生不成名愧我文。冥漠精誠
定無間。泉臺好把此詩焚。

死友難忘生友稀。每歸與子話心期。十年湖海勞人夢。一卷
風塵失意詩。因果茫茫前定業。乾坤落落數交知。還家見面
時疏畧。應未嫌吾過從遲。

別范大

君病我忙欲見難。歸來一月夢言歡。東風又向天涯去。臨別匆匆把袂看。

同恂加買舟至海上。舟中無事偶作。

風帆葉葉下吳淞。渠自西行我欲東。惘惘別離違故里。依依身世感秋蓬。銜山暮色蒼茫遠。到耳鄉音約畧同。何處輕帘費酒市。一樽共話對江楓。
只為飢驅欲住難。登程扶母強為歡。相看白髮垂垂老。尚覺東風獵獵寒。我輩消愁惟飲酒。故人臨別勸加餐。還家畧說相思苦。袂上啼痕應未乾。

晚泊黃渡有懷

晚飯無聊酒一尊。林梢鬢鬢已黃昏。橈聲漸緩行隨月。人語

微喧知近村。海曲鶯花今日盛。天涯師友幾人存。凄然不寐

緣何事。剪紙重招宋玉魂。

規生沒二年

小舟偏仄殊甚苦之。因念此行。慨然有作。

紙篷偏仄僅容身。坐便跣趺倦欠伸。尋樂有方詩亦好。破愁無計酒相親。只緣貧賤悲遊子。那得安危托故人。揮手忽忽從此去。茶蘼開到已非春。

蓬萊清淺渺登天。跋扈飛揚讓少年。應俗文章方自愧。傲人意氣肯蒙憐。買來馬骨知非駿。老去蛾眉敢鬥妍。放逐海濱吾計左。幾時歸臥故江邊。

和管小異兩絕句

閱歷乾坤溷主賓。早憐兩脚插紅塵。夢中證得前生果。本是

清涼山下人。

勸華館詩錄卷二終
勞勞送客復迎賓。已分微生墮劫塵。明月一窗鐘一杵。惺然
夢醒別無人。

勸華館詩錄卷二終

